

ZOU PRESBYTERIAN CHURCH SYNOD

(The Presbyterian Church of India)



HATTUOM KHUTTAWI BU **(Reprint 2019)**

Synod Publication Board

ZOU PRESBYTERIAN CHURCH SYNOD

(The Presbyterian Church of India)



HATTUOM KHUTTAWI BU (Reprint-2019)

Synod Publication Board

HATTUOM KHUTTAWI BU

Published by:
The Synod Publication Board
Churachandpur, Manipur

Sut Thumna
(Revised & Enlarged) 2017
Copies - 500

Sut lina
(Reprint) 2019
Copies - 500
© *All Rights Reserved*

Printed at:
Lamka Printing Studio
Churachandpur, Manipur

A SUNG A THU UMTE

- 1. *Thumapui*..... v**
2. *Pasian be ding a chielna* vii

3. KHIIL-1

- 1.1 A Postolte thugin 01
 1.2 Mangbiehna 02
 1.3 Baptisma leh Mangpa nitah ann 03
 1.4 Hattuum thununna Dan 06
 1.5 Kal chin Kikhop dan 11

4. KHIIL-2

- 2.1 Naupang piching a lahlutna 17
 2.2 Nau latna 19
 2.3 Baptisma 21
 2.4 Mangpa Nitah Ann 25
 2.5 Upa namdetna 28
 2.6 Pro/Pastor namdetna 31
 2.7 Pastor Namdetna 32
 2.8 Pro. Pastor koina 34
 2.9 Missionary sawlkhietna 37
 2.10 Kitenna 38
 2.11 Mishi Vuina 42

5. KHIIL-3

- 3.1 Thununna Piehna 45
 3.2 Thunun a umte lahlutna 46
 3.3 Pemte lahlutna 47
 3.4 Hattuum dang apat hing lutte Lahlutna 48

6. KHIL-4

4.1 Suongphumna/Honna	49
4.2 Biehinn tha honna kikhop	50
4.3 Hattuum tha honna	52
4.4 District tha honna	53
4.5 Hattuum Ni poimawte	55
4.6 Kumchin Sepguol Vaiguon	57

7. KHIL-5

5.1 Pien ni	59
5.2 Nau min phuona	60
5.3 Lawchinna	61
5.4 Kaisanna lopna	61
5.5 Kitenna ni	62
5.6 Jubilee lopna	63
5.7 Inn tha honna	64
5.8 Han suong honna	65

8. KHIL-6

6.1 Biehinn sung vanzahte	67
6.2 Biehinn sung kizah dan	68
6.3 Khristian ni poimawte	69
6.4 Dah sat dan	70

7. KHIL-7

7.1 Bible tang poimawte	71
# Laibu ette	74

THUMAPUI

Hattuom Khuttawi Bu khu Manipur Gam Presbytery (MGP) in kum 2001 a ana suopat ahia, tuin, Zou Synod a idintah jie un Synod Khuttawi Bu (Synod Hand Book) chi ahita ding chia ZPCS 5th Session Resl. No 41 Dated 14/2/2009 na in ana phatsah bang in, tukum 2009 sunga zaw man ding in Rev. Stephen Chinzathang, Executive Secretary, ZPCS i/e Literature & Publication Board leh Upa Khupsuankham a enpha ding a guot ahi bang ua, tawmngai tah a ang et phat zou bang ua hing kisuo khie thei ahi.

Leitung huop a i Presbyterian hipi Pawl lien Wales gam a mite, Scotland leh England gam mite, unau Mizoram Synod leh pawl dangdangte bawl dan enton in poimaw sah deute zong belap ahi.

Literature & Publication Board Resl. No. 3 (a) dated 01/10/09 phasah bang in 2nd Edition suokhiet ahia, 12th ZPCS Session R/No. 22 leh Last Literature & Publication Committee R/No. 2 in tami Khuttawi Bu Revise bawl a, bukim zaw sem a bawl ding phasah kia ahia, a bawl ding in Rev. Dr. Hangpi Manlun mawpuohna pieh ahi. Aman zong theitawp hing suo in ahing zaw toh kituoh in 13th Synod Session R/No. 40 phasah bang in hing kisuokhie hi. Koipou Pastor, Upa leh a zang ding a kilawm zousie in zang chiet ulei i phattuompi mama ding uhi.

A Hattuomte kipuina leh kizahna manpha zaw petu i Mangpa'n hing guoljawlta hen, Amen.

Mangpa'n loupina zousie tang taken.


 (REV. KHAMCHINKHAI)
Executive Secretary
i/c Synod Publication Board

PASIAN BE DING A CHIELNA

(Puitu in Pasian be ding a hing kikhawmte chielna ding a Bible taang sim dingte).

Siem. 28:16, 17	Danp. 4:29	Danp. 7:9
Danp. 10: 20,21	I Khang. 16:8-11	I Khang. 16:23-25
I Khang. 16:29	Neh. 9:5, 6	Late. 5:7
Late. 8:1	Late. 18:12	Late. 19:1
Late. 30:4	Late. 33:1, 2	Late. 34:1-3
Late. 46:10, 11	Late. 47:1	Late. 48:1
Late. 47:6, 7	Late. 64:1, 2	Late. 66:1, 2
Late. 66:4	Late. 67:3-5	Late. 68:32
Late. 69:30	Late. 71:22	Late. 72:18,19
Late. 81:1	Late. 84:1-4	Late. 86:12
Late. 89:1:5	Late. 92. 1, 2	Late. 95: 1, 2
Late. 95:6,7	Late. 96: 1-4	Late. 96:7-9
Late. 97: 12	Late. 98:4-6	Late. 99:9
Late. 100:1-5	Late. 103:1, 2	Late. 103:20-22
Late. 105:19-22	Late. 106:1	Late. 107:8, 9
Late. 113:1-3	Late. 117:1, 2	Late. 134:1, 2
Late. 135: 1-3	Late. 136:1, 2	Late. 145:1-3
Late. 145:10	Late. 146:1, 2	Late. 147:1
Late. 147:7	Late. 147: 12	Late. 148:1, 2
Late. 148:3, 4	Late. 148:11,12	Late. 149:1-3
Late. 150:1-6	Isai. 40:26	Isai. 40:28, 29
Isai. 44:23	Isai. 45:23	Luk 2:14
Johan 4:24	Jakob 4:8	Kil. 5:13
Kih. 4:8	Isai. 55:6	

.....

Khiil- 1

1.1. APOSTOLTE THUGIN

Bangkim bawlthei, Pa Pasian,
Lei leh Van siempa khu ka gingta hi.
A tapa neisun Jesu Khrist,
I Mangpa Jesu Khrist zong ka gingta hi.
Ama khu Hagau Siengthou in a gaisah a,
Mari in nungah a hilai in a hing khie hi.
Pontia Pilat in huoisetah in a thuoh gimsah a,
Singlamte ah kilbeh in a um hi.
A shita a, phum in a um a,
Mishikhuo ah a vahaw a,
Nithum ni'n mishi lah a pat a thoukiata hi.
Van ah katou kia in,
Bangkim bawlthei, Pa Pasian zietlam ah a touta hi.
Khuna pat in hing kumsuh kia va'n
Mishi leh mihing vaihawmsah ding in.
Tuachi'n Hagau Siengthou ka gingta a,
Mi zousie a ding a Hattuum siengthou um zong ka gingta hi.
Mi siengthou kipawlkhawmna zong ka gingta hi.
Khel ngaidamna ka gingta a,
Tahsa thawkiana ka gingta a,
Kumtawn a hinna toh, Amen.!!

.....

1.2. MANG BIEHNA

Ka pa uh van a um,
Na min kizatat hen,
Na gam hing tung hen;
Na deilam van a min a bawl bang un,
Lei a mi'n zong bawl hen;
Nichin ka neh khop uh ann hing pien;
Ka tung ua khielte ka sawhlou bang un
Nang zong ka khelna uh hing sawh sin
Solna'h hing puilut sinlen,
Gilou lah ah hing hundam zaw'n,
Gamte, silbawltheinate, loupinate,
Kumtawn a Nang a ahiziehin, Amen.

.....

1. 3. BAPTISMA LEH MANGPA NITAH-ANN

Khrist in a Hattuumte Sakramen ni a pie hi. Tuate:

- i) Baptisma leh
- ii) Mangpa nitah-ann ahi.

1. BAPTISMA

Baptisma khu Pa, Tapa leh Hagau Siengthou min a tui a ksilna ahia, khum khu Khrist toh kipumkhatna, Hagau Siengthou a hin kilamdanna, kisiemthana leh Mangpa a i kipiekhietna etsahna ahi. Tam khu i khelna kisia a, Khrist a ginna zieh a hundampa a pomte leh a tate bou tansah ding ahi.

- A i) Pasian khat a mihing thum khenlou a gintat ding (Mathiu 28:19).
- ii) Hundamna ding a Pasian thuchiem leh a nnasep bou gintat ding (IIKor. 13:14).
- iii) Kumtawn goulou ding a Pa, Tapa leh Hagau Siengthou kung a kipiehna thuhun khu ahi.

B. Baptisma khu khatvei sang a tamzaw a kitang ngaisih hi.

Mangpa khat bou ahi a, Baptisma zong khat bou ahi hi. (Eph. 4:5-6).

C. Naungeh leh naupangte baptisma tansah ahina ziehte:

- i) Pichingte bang in Pasian in amaute zong deisah in Ahundam nuom hi (Mathiu 18:14; Mark 10:14)
- ii) Thuhun lui ah zong naupangte a pang zel ua, Khantanhoiin ang huoplet nua in apanlouna ding thu a umsih hi. Lungsietna leh kumtawn hinna tang tah zong a hi mawngmawng uhi.

2. MANGPA NITAH ANN (SACRAMENT)

1. Hagaulam sil ahi kichien zawsem a i theitheina ding a Khrist in ang pieh ahi (Rom 4:11)
2. Kumtawn a Khrist Hattuum theizingna ding ahi (I Kor.11:24). Tualeh Pasian thuhun chiemtena i ginna suhdet leh suhhatna ding ahi.
3. Pulam chiemtena leh sunglam hagau a ding a hoina ahi.
4. Khrist hing shina zieh a sil hoi i nei uh theizingna ahi.
5. Mangpa Nitah-ann ah tanghou leh greptui a kizang hi (Matt. 26:16-28).
6. Mangpa Nitah-ann a tanghou leh greptui in Khrist tahsa leh sisan a ensah hi. (I Kor. 10:16)
7. Mangpa nitah-ann gintat aphattuomnate: Tanghou leh greptui i tahsa in a phattuompi bang in Khrist tahsa leh sisan zong khu i hagau suhhatna leh hamuonna ahi (Jn. 6: 54-55).
8. Tanghou kiphalsuo in Khrist tahsa khu vuoh sidup a aum a ensah hi. (Isai 53:5).
9. Greptui nou a sunkhiet in Khrist sisan i bawlkhielnate zieha hing luongkhie a ensah hi (Matt. 26:28).
10. Mangpa nitah-ann tangte kung a tanghou leh greptui kipie in Pa Pasian in Khrist a hing pekhie a, Khrist khu gingtute kung a hing kipiekhietna a ensah hi (Jn. 5:12).

11. Mangpa Nitah-ann im a i nehna jiehte:
 - a) *Khrist thupieh zuina ahi (I Kor. 11:24).*
 - b) *Khrist leh a singlamte pansan a, tam a shina bou khu mikhielte ding a kilemna leh hundamna tan kilam-etna etsahna ahi (I Kor. 11:23).*
 - c) *A hoina jieh a silpieh pieh a Ama itna leh pomna etsahna ahi (Late 116: 12-23).*
 - d) *A Tapa ang piehkhietna jieh a Pasian i pawlna ahi (Johan. 1:3).*
12. Mangpa Nitah-ann nete'n tamte ah a ki- enchien masa ding uhi:
 - a) *A khelna tung ah kisiana tahtah a neinai? (I Kor. 11:28; Joel 12:12; Nas. 3:19).*
 - b) *Hinna tha a um a tum mawngmawng na uoi mah (Rom 6:19).*
 - c) *Khrist hing kipumpiehna khu amaun a tulmaw na uoi? (I Pet. 1:7).*
 - d) *Hundamna ding in Khrist bou a gingta na uoi? (Late 62:1; Phil. 3:8; Nas. 16:30-31).*
 - e) *Khrist shina khu theizing leh kipahpi in a um na uoi mah? (Kih. 1:5-6; Jn. 15:13; I Jan. 4:19).*
 - f) *Mi zousie it a tum hamhamna uoi mah? (Matt. 5: 44-45).*
13. Chinlou pumpum a Mangpa Nitah-ann nete khu:
 - a) *Mangpa tahsa ngainalou, Hagau Siengthou theisahna tan kilam-et vatehlou, pulam dan bep a gingtate ahi uhi.*
 - b) *Pasian kipawlpilou a, a hagau ua dia deina neilou, daan a kingamte ahi uhi (I Tim. 4:8; Jn. 4:23).*
 - c) *Kilemna deilou, lungtah leh bawlkhel kisa ngailoute ahi uhi (Matt. 5:23-24).*
 - d) *Silbawlkhiel nawnlouna ding a Pasian toh i kikaal thu athuhun lang giagua theina sasa a, lungtang phengphi taha sil bawlkhiel paupaute ahi uhi (Hos. 10:4).*

1.4. HATTUOM THUNUNNA DAN

I. HATTUOM MI HINA

Mi koipou in hattuom a lut ding a ang kinget leh pilvangtah a etchien masah ding ahi a, tuabang etchetna ding in tam anuoia kitahlang thute toh ama mihina kituoh ngeina chia theichet leh gintat ngam mite bou lahlut ahi giap ding ahi.

1. Hagau Siengthou nnasepna jieh a mikhiel ahi kithei chetnanei mi, a khelna pawna a, lungkham a hundamna sui mi ahi ngeingei ding ahi (Nas. 2:31,38;16:30).
2. Khrist kung bou a hundamna sui a, hundampa loup i leh palai hoi bukim a pom mi ahi ding ahi. (Jn. 16:8,9;Phil. 3:7-9).
3. Khrist leh A dihtatna kiphamaw a gilkiel a dangtah mi ahi ding ahi (Matt.5:6; Heb. 10:25; Rom. 10:17).
4. Khristian thugin poimawte toh kikal ngaidan zousie pomlou a; Pa, Tapa leh Hagau Siengthou thu leh thugin poimaw dangte kitheimaw bawllou a, pomdet tinten mi ahi ding ahi (Jak. 1:6-8).
5. Hattuom khu Khrist hattuom, Khrist phukhiet Khantanhoi “Thutah khuom leh ban; kingahna” ahi ngeina hi chi pomdet mi ahi ding ahi (I Tim. 3: 15).

II. SAKHOLAM A KHRISTIAN HINKHUO

1. Pasian bieh khu Khristiante bawl ding a sil pawimaw pen leh masapen ahia, a nelsie ding ahisia, a ngai poimaw zing ding ahi (Jn. 4:33; Kih. 2:2; Mk. 12:29-33).

2. Ama leh anuoi a mite'n Pasion Ni khu a nit ding uh ahi. Van lei leh zuate, Kitawldamna ahi chia mawh imutna zong zang mailou a, tualeh ama dei leh phattuomna ding a hun kizen a mangmai lou in Pasion biehnna, A thu ngaikhietna leh ama hagau a ding a sil phatuomte bawl na a man zawh ding ahi (Pawt. 20:8-11; Isai 58:13-14).
3. Pasion thu toh kituoh lou Khristian lungsim suse thei miel nnasep, sa-utnate, chiemmui giloute, lamte, liim-utna kichienloute khu taisan ding ahi (I Kor.6:17; Rom 12:2; Eph.5:11).
4. Kingaina thanguoi leh huona lam sil suol bangma abawl lou ding ahia, gitlouna lama hing kailut thei silte zousie a kihep mangsan ding ahi (I Kor. 6:9; Eph. 5:3).
5. Kithoina – siempu tungton a phuisan chite mawngmawng bawl ding a hisih hi. Siempuna toh kisai – aisante, daw i biehnna silte leh khutlam-et chite bawl tapou khu leitung dawithutawite zang a sil bawl toh kibang ahizieh in bawl mawngmawng lou ding ahi. Sil bangkim a Pasion a gintat zawh ding ahi (Siempu.19:31; Danp. 18:10-11; Pawt. 20:3; Luk 4:8).
6. Pasion thu in ang hildan bangtah a i lungsim a Pasion gintatna lamang thei zousie – Milim biehnate, leitung/gingloute ni-le-ha nitte, nipikaal khat sung a ni hoituom nei chite a pom ding ahisih hi. Tam bang zousie sep khawm nianua in Pasion tahtah leh leitung Pasion bekhawm china ahi (Luk 4:8).

III. MIMAL A KHRISTIAN HINDAN:

1. Mihing suse thei leh Pasion gam nasepna a chitlou theina neh-le-dawn thu ah kideh thei ding ahi (Luk.21:33; I Kor. 6:10).

2. Mizousie eima toh kituoh a siengthou tah a kicon ding ahi. Kiletsahna, kiphatsahna leh gilou lam a hing kailut thei kivonnate khu kihep mangsan ding ahi. Kivonna khuThuhun Tha in Khristian hindan dingte lah a poimaw ahidan chientah in a gen hi (I Tim. 2:10; I Pet. 3:3-4).
3. Mizousie ama nasepna chiet a a ginum ding uh ahi. Septheina leh hun khu a kilepsan mai ding uh ahi sih hi. Tuabang mi khu Pasian in a mawsiet dan i thei zing ding uh ahi (Matt. 25: 26).

IV. KHRISTIAN INNKUON HINDAN

1. Innkuon sungthu khuoltup in a tate uh Mangpa theina leh zatatna lam ah a kailut ding uh ahi. Innkuon kikhop a bawlthei dandan ua a bawl ding uh ahi. Tua ahisihleh a tate uh Mangpa lam a kailutna hun manpha a nei sih ding uhi (I Tim. 3:4; Ephe. 6:4).
2. Mihingte ki-unauna lam zousie ah Pasian thu in a gente khu kituptah a azui ding ahi. Tuate: Zi-le-pasal tungtangte:-
Nu-le-pa leh a tate uh tungtangte, Lamkai leh anuoi a nnasem a kithalawte (Eph. 5:22; 6:2).
3. Gingloumi a kinunpi ding ahi sih a, Khristian thugin nielkal leh gindan dang pom mite a kinunpi ding uh ahi sih hi. Kiteng masang leh kiten nua in leitung dan hoilou azui ding uh ahi sih hi. Kiteng tapou in a hagau uh hoina ding a ngaisut ding uh ahi (I Kor.6:14).
4. Hattuum mite khu hattuum danlou a a kiten ding uh ahi sih a, tuabang a kitengte khu kipahpi ding ahi sih, sil kilawm lou ahi hi. (II Kor. 6:14-15).

V. HATTUOM KIVAIPUOHNA LAM A KHRISTIAN HINKHUO

1. Koi in zong a unau sil bawl khiel a mu tahleh Khrist hingzilsah dung zui in siemphat sawmleh ahoi hi. Siemphat thei vawtlou a hileh thunnun ding ahi (Matt. 18:15-17).

2. Khristiante lah a kihenna ang umtah leh hattuum in huptuom paituom neilou in pilvangtah in thudohna a nei ding hi. Thutanna a siem masang un tua thubuoi theipite thusun kituptah in ngaisutta hen. Hattuum thununna thuoh ding ahitahleh lungsietna nei in thununta uhen (Dan. 19:15-18; Gal. 6:1).
3. Thunun ngai khop a sil bawl khielte khu a kisia nading uleh hattuum dante kepbitna a thunun ding ahia, a kisia chieng ua lahlutkia ding ahi. Lahlutkia ahi masang un hattuum ah panna piehlou ding ahi. A kisia leh kisialou etna ding in haguh sung hun-et ahi ding hi (I Kor.5:1-5).
4. Hattuum a kituohlouna leh kisel kibuoina ang umtah leh hattuum in a ngaituo ding a, ahitheh leh thutanna a siemding hi. A thubuoi a khentan thei sih uleh hattuum thuneina sangzaw ah tutta uhen (Pawt. 18:21-26).
5. Hattuum bieh kikhopthe khu a hoi leh kizen theipen a bawl ding ahi. Lai Siengthou sim masah a thumna leh la sahnate bawl ding ahi. Tuazou chieng in kithuhilna, kihantawhna, kihamuon leh Pasion thu thei kiphamawte gen ding ahi. Kikhop sung khu asawt seng a hilou ding, a phatuom ngei ding a lungelna toh bawl a hiding ahi.
6. Tuabang kikhopnate khu hattuum in a tel khawmpi in a namdet mite bou in a lamkai in a pui ding ahi.
7. Hattuum Upa ding in hattuum thugin pomdet leh Pasion ngaisah mi bou tel giap ding ahi. Tam Khantanhui bulite, Thununna dan, Mangpa nitah-ann thu leh Hattuum thuginte kichientah a thei leh pomdet mi ahi ngeingei ding ahi.

VI. KHRISTIAN KHOTANG HINKHUO

1. Miten ama tunga abawl ding adei leh hoi asahte khu mi tunga bawl a sawm tinten ding ahi (Matt. 7:12; Luk.10:33-37).

2. Mihing leh pawlpi a ding a hoi leh panpina nasep khawmnate ah ama bawl theidan a zil a kisit vawtlou a pang a, Sawm-a-khat tuohkhawm pe mi ahi ngeingei ding ahi. “Mi zousie tung a sil hoi a bawl ding ahia, gingtute kung ah a dieh in a bawl ding hi.” (Eph.2:10).
3. Ngaisutnate, tenate leh chiemtenate khu kituptah a bawl ding ahi (Siempu. 19:35; Kih. 20:10).
4. Guhsilte, lepguhte, huoiham jieh a mi bawl genthei leh sum-le-pai a apmai chite chinlou ding ahi (Eph. 4:28; 5:5).
5. Bat-le-sankia thu ah mi ginum a hi ding ahi. A huntah a dihtah a sankia sawmlou mi khun bangma palah ding ahisih, kisolna ahijieh in (Late 37:21).
6. Summet bawl mi khu sum zah leh zehna lam a pilvangtah ahi ding ahi. Pilvang loutah a sum zahmang zing a, duhdahloutah a mi sum bat zing khu sil hoilou leh gitlouna ahi (Luk. 16:2).
7. Leibat sang zoulou khop a chimawte tung a zangai thei tah a thuohzou mi ahi ding ahi (Matt. 18:23-25).
8. Thuchiem leh thuhun poimawte khu a palsat ding ahi sih a, ahithe i dandan a tangtun mi a hiding hi. Pasian min a kithuchiem khu Pasian in a theipi ahia, kitheimaw bawl a palsan ding ahisih hi (Rom 1:31; Late 15:7; Pawt. 20:7).
9. Van lei leh zua thu ah ginum a hi ding hi. Van lei ding khu gensiet seng mawh ding hilou a, tuama bang in a zua dingte zong gen tui mawh ding hikialou hi. Theisihna chia sol mai ding ahisia, aman dihtah leh bazar a aman a thei dandan ua gen a leisah ding ahi. (Siempu. 26:14-17; Thup. 20:24; Danp. 2:6-7).
10. A aw suo uh a sienthou ding ahia, dih leh kilawm hun giep in thu a gen zaw ding ahi. Awse suo, hansie, Pasian min amawhna a law chite, ham kilawmlou leh zummaw ham,

mi gensiet leh huotgen chite chin mawngmawng lou ding ahi (Eph. 5:3-4; Matt. 12:37).

11. Pawngpan a mi niel ding ahisia, kiminsiel, kisam leh thu nawngkai gen chin ding ahisih hi.
12. Mi zousie toh kituotah a hin khawm a sawm tinten ding a hi, a innvengte leh Mangpa a a unaute huotbawl, muda leh suhsiet tum gige mi khu Pasian gam mi hitah ahisih hi (Rom 12:18; I Kor. 6:9).

1.5. KAL CHIN A KIKHOP DAN

I. Nilaini zan Hattuum Kikhop:

(Nilaini zan khu dan zou kimteng kikhopna a man jel ahia, hinanleh vantang kikhop bang in i mang jel thou uhi).

Puitu in: Pasian chibai buh va ui: “Nou midih zousiete aw, Mangpa silbawl thanoppi in kikou un, Ama thununte aw, Ama phat un, (Late 33:1) Amen”.

Ahisihleh

“Tuaziehin hangsantah in, “Mangpa kei hing panpipa ahia, Ka zau sih ding hi, mihingin kei bang ang law thei diei,” i chi ngam uhi. (Heb. 13:6), Amen.

Pasian thu ngai va ui: (Bible sim athumna)

Thungetna:

“Aw Mangpa na umpina dei in Na masang ah kang kikhawm ua, Nangman kipawlkhawmna hun hoi Nang siempieh zieh in ka kipah uhi. Tam hun hoi Nangpieh khu ka phattuompi theina ding un ka sep, ka bawl zousie uh hing guoljawlin”, Amen.

Hattuum thupuon:

(Puon ding umte Tuolsung Hattuum Lai-attu in Puong leh)

Pantu:

(Bible sim, la tel leh thungetna)

Bible tang genna:

(Bible tang gen ding a umleh)

Thupi genna:

(Thugen ding a guot a umten thugenna nei va).

Lasahna: (Puitu ahisihleh Thugentu in a la tel sahna)

Tawpna: Mangbiehna/Guoljawlna

II. Kiginni zan thumkhawmna:

(Kiginni zan khu thumkhawmna kikhop a man jel ahia, testimony gen ut, Bible sim ut, La sa ut, kipah thu gen ut, Bible tang gen utte leh thumguolna hun a man jel ahi).

Puitu in:

Pasian chibai buh va ui: “Hing pei un, A masang ah kun in Ama khu be va ui; Ei hing Siempa masang ah khupdin va-ui! (Late 95:6), Amen Ahisihleh “Pasian hing nai un, Tuachiin Aman noute hing nai va. Nou tawnkhiete aw, na khut uh silsieng un! Na lungsim susiengthou un! Nou milepchiete aw! (Jakob 4:8), Amen.

Thumna:

“Bangkim bawlthei ka Pasian uh, Na lungsietna jieh in Na mai ah kang peikhawm ua, Nang toh kipawlina siengthou nang siempieh jieh in lungdamthu kang tut uhi. Na miten ka poimaw u’leh ka ngette uh ngaikhien len, Hagaulam guoljawlna tha toh na mite hingguoljawl in”, Amen.

Hattuom thupuon:

(Puon ding umte Tuolsung Hattuom Lai-attu in Puong leh)

Pantu: (Bible sim, la tel leh thungetna)

Bible tang genna: (Bible tang gen ding a um leh)

Thumguolna:

(Puitu in thumguolna a thei dingte abanban in hing puong van la tel a kisa dinga tuachiin thumguolna nei ahi ding hi)

Thupi genna:

(Thugen ding a guot a umten thugenna nei va).

Lasahna: (Puitu ahisihleh Thugentu in a la tel sahna)

Tawpna: Mangbiehna/Guoljawlna

III. Nipini Sun Kikhop (Piching Nipi Sang Zilna):

Nipi-Sanginn atuom a kineilou ahijieh in Nipi-Sang Kikhop ah Pasian thu kihilsahna ahipen a, Puitu in hun a tom thei bang a jah ding ahi.

Tualeh Sangsyeten Bible Text Bu a zah ding uh ahi. Sangnaupangten zong Bible ma tawi ding ahi. Hilchetna Bu pen i lungdonnate hing hilchientu ahi lel hi. Tualeh Nipi- Sang kikhop chieng in Puitu in Pasian chibai buh va-ui chi in anuoi a Bible tangte a deina pen khat sim ding.

1. Puitu: “Na Itna detdou khu hing theisah kia in. Ka ginna na tung ah ka ngata ngal a. Ka thungetnate na tung ah hing tung hen. Ka peina ding lampi ei hil in” (Late 143:8) Ahisihleh “Mun gamlatah a namte aw, Gal gamte a Leenggamte aw, ka thugen ngaikhie un! Ka pien masang in Mangpan ei teldohta a, tuachin a suohpa ding in eina guotzouta hi.” (Isai 49:1)

Ahisihleh

Tuaziehin Hagau Siengthou in ana gen ma bang in Pasian aw khu tunia na zah ua ahileh Pasian tung a helbawl na pu-na pate uh Gamdai a ana um lai ua a lungkhau gemgom a ana ze-et uh bang sih un” (Heb. 3:7, 8)

2. Thumna :**3. Pantu :****4. Nipi-Sang thawlawm:****5. Silpieh latna:**

(Tungnungpen a ka Pasion uh guolzawl na chinteng in Nang guolzawl a, nang guolzawltu ka lungsiet uh chi suhlatna in Nangma chibai buhna ding in Nang a kipata ka mute ua pat in kang lakhawm ua, hing pomsah inlen hing guolzawlin chiin Mangpa Jesu min in ka hing lan uhi.

6. Thusin diingte puonna:**7. Thupuonna:**

Hattuum toh kisai thu poimawte.

8. Min lamna:

(Nipi-Sang lai-at in Sangsyete minlamna nei va). Tuachiin Pawlchinteng in a Sangsyete uh lamkai nain amau touna mun chiet zuon va un, minlamna nei va uh.

9. Nipi-Sang zil na (Class):**10. A Khaikhawmna:**

(Pawl tuomtuom a a kikhenleh) Group chinteng in a zil zou chieng in Superintendent in a khaikhawmna tomkim in nei van, Dohna bawlvn, thuchiin a group ahiei a un pi ahiei in gensah in hun tawp siemta va. (Class chin in Minute-30 leh Superintendent in Minute 10 khel zang sihleh hoi va.

11. Report:

a) Nipi-Sang toh kisai:

b) Hattuum toh kisai :

12 Pasion phatna laa :**13. Tawpna : Guolzawl na/Mangbiehna.**

Thei diingte:

1. Ahithe tan a Group a kikhen diing
2. A group zaza a Sangsye guot diing
3. Kal chin a lemtang hun ah Superintendent in Sangsyete Etkhawmna masa neipi zel va.

IV. Nipini Zan Kikhop:**1. Puitu in: Pasian chibai buh va-ui:**

“Hinanleh MANGPA’N hing panpi ding hi chia ngah ngetngut te’n a hatna uh siemtha ahi dan uh muta va un, mupi bangin hazap in lengtou ta va un, Tai va un: Gim nawn ta sih va uh. Lamzawt va un, Ba nawn ta sih va uh”. (Isai 40:31), Amen.
 “Aw hing pei un, MANGPA phatna la i sa ding uhi; i hundampa suongpi pahtawi in, nuomtahn ikikou ding uhi. Kipah thu gen kawmin amasangah ipeiding ua, phatna lasa a Ama pahtawiin, nuomtahn aw isuo ding uhi.” (Late 95:1, 2), Amen.

2. Pantu: Pasian thu ngaikhe va-ui: Bible sim.

Thumna: “Ahing lungsiettu ka Pasian uh bangkim bawlthei, ka kikhopna ua ka sep ka bawl zousie uah na Hagau pawlna ka tantheina ding un na Hagau in hing umpi ta hen”, Amen.

3. Hattuom thupoun:

(Puon dingte tuolsung hattuum Secretary in puong zel leh).

4. Silpieh lahkawmna leh latna:

(Puitu in la tel va’n silpieh lahkawm lai in chitah suo-in guot a um pen in tambangin alan ding hi).

“Bangkim siemtu leh neitu MANGPA ka Pasian uh, bang kim kipahna dan thei a, na Hagau in ang suhal a; tuajiehin ka kiphalna uh bang a na mite’n kang tawikhawmte uh, petute lungsim suhsiengthou pieh a bangchihlai pou in na Hagau in umpi in. Tam kang silpiehte uh kou a ding a malam sawnna, na gam kehletna ding leh na loupina dingin Mangpa Jesu min in ka hing lan uhi.

5. La sahna:

(Puitu in la tel in thugen dingtu a han ngal ding hi).

6. Thugentu:

(La kisa zou pan ahijiehin sah kia se ngailou in thupi a lut ngal hileh).

7. Lasahna:

8. Tawpna: Mangbiehna/Guoljawlna.

.....

Khiil- 2

2.1. NAUPANG PICHING A LAHLUTNA

Naupan lai a nu-le-pa'n baptisma a na tansah sa kum 14 hingching tate leh kum chingsa a baptisma tang thate hattuum dan zoutha ding a lahlutna nei ngeingei ding ahi, Tam bang bawl na ding a atuom a kikhopna bawl thei ahisih lezong bieha kikhopna khat pou pou a bawl thei ahi. Tam hun a puitu dinga hattuum komiti (LCC) in a guot Upa/Pastor ahiding a, tambang in hun azang ding hi:

1. PUITU:

Pasian chibai buh in Ama beva ui; “Koi zong loukaina langkon tu a a nualang a ngatleh Pasian gam ading in simtah ahisih” (Luk.9:62). “Pasian ta deitahte nahi jieh un Ama umdanla un” (Eph. 5:1). Amen.

2. PASIAN PHATNA LAA:

A lemtang leh a kituohpi la khat sah ding ahi.

3. LAI SIENGTHOU SIMNA:

Luk. 9:23-28; 57-62; II Tim. 2:1-10

4. THUNGETNA:

5. PUITU: Unaute aw, tamte (a min uh lam kawm in) khu hattuum dan sunga lahlutna nei ding i hi a, a tungtang thu a/ua gending leh sep ding um zousie hattuum Committee in a na zousiengta ua, tuin thutam lou dohna i nei ding uhi. (Lahlut dingte a ding diing uhi).

6. THU DOH DINGTE**A. 1. Sakramen thu**

2. Khantanhoi bu lite sung a thupi deudeute
3. Hattuum thugin te

B. Tam dohnate dan zou tha dingte'n a thei ngeingei ding ua lamet ahi.

1. Pasian in eite hundam ding in koi a hing sawl ei?
2. Khum a mi sawl in ang hundamna ding in bang a bawl ei?
3. Mikhiel in bang toh bang in e hundamna a nga thei ding?
4. Pa, Tapa leh Hagau siengthou na ginta ei?
5. A hattuum siengthoute, mikhiel a ngaidamte, a thawkiana thute leh kumtawn hinna thute na ginta ei?
6. Tam Hagau leh hoina ngana ding a lampi poimaw Sakramente, Pasian bieh kikhopte na ngai poimaw ei?
7. Pasian hattuum khu lam chin teng ah zop a zui tinten natum ei?
8. Na nu-le-pate'n baptisma na tanlai a/ua nang/nou ding a/ua, a thuchiem uleh mawpuohna a lah u'khu, amaute liengkou a pat na la ngam in/un nang/nou tung ah na nga ngam diei?

C. LAHLUTNA

(Lahlut dingte ding zingva un, mipi zong a ding diing uhi).

Unaute aw baptisma ah Pasian innsung mite hiding a chiemte na hita ua, tuin nouma hoisah leh deitelna bang in hattuumte lah a pang a, Khrist thu puongzah zel dingte, kisusiengthou zing ding leh na thu chiem ua ginum zing dingte leh Khrist lungsietna tang ding in na hing peita a/ua; "tu in nang/nou ka unaute uh, Jesu Khrist hattuumte lutang leh lamkaipa min in, a hattuumte'n Mangpa dan leh Sakramen ahte, Hagau lam hoina tang dingin Hattuum kithuona bukim ah ka hing lawmlutta." "Shi tanphain ginum in tuachi'n Hinna Manglukhu kang pe ding" Mangpa Jesu'n achi hi.

“Pa leh Tapa leh Hagau Siengthou theina lam a na hing khanlet theina ding leh/uleh Van a mi siengthoute kithuona bukim a na lut theina ding in/un Mangpa’n a hagau in hing panpi in guol hing zawlta hen, Amen.”

D. CHIBAI BUHNA:

Puitu in Hattuumte thatangin kithuona khut zietlam pie in chibai a bawl ding hi.

E. THUMSAHNA:

Puitu ahilouleh guot a um pen khat in thumsahleh.

F. HANTHAWNNA THU

(Ahithei leh Mangpa ann sieng imm hileh) Tam hantawh thugenna khu hattuum makaite’n a guot pen un a zang ding hi.

G. PASIAN PHATNA LA

Ahun leh amun toh kituoh la khat sah ding ahi.

H. TAWPNA

Mangbiehna/Guoljawlna.

2.2. NAU LATNA

Nau lat ding neite’n hattuum Chairman leh Secretary kung ah theisahna bawl in, naungeh min baan ah a piennite lai a gielkhie in a pe ding ua, tuachi’n Upate’n hun lemtang Pasianni zingmawng biehnin kaina ah tam hun a guonggal ding uhi. Pastor umlouna mun ah Upa khat (Chairman ahitheileh a hoi ding hi) in tam anuoi a bang in latna a nei ding hi. (Nauminphuoh hun a innlam a hattuumte chiel a naulatna bawlthei thou ahi).

1. Thupatna: PASTOR/UPA: “Pasian thu ngaikheva-ui,” chi’n Lai Siengthou tang hoi leh kituoh asahpen khat a sim ding hi. (Danp. 6:4-7; Late 127:1-3; Mt. 18:1-5; Mk. 10:13-16; Heb. 2:13; Isai 8:18). Naungeh nu-le-pa (a kemte’n) naungeh amailam ah hing peipi va un.

Khrist a i unau,leh
 te'n Mangpa apat gil a ga goutan naungeh dei-umtah a tanna
 tung ua Pasian kung a nuomthu gending leh a pepa khut apieh
 khietna nei ding a tam mun ang nai thei jiehun hattuum in i
 kipahpi mama hi. Tuin tam naungeh Pasian khut a latna nei
 ding i hia, mit a mu a theipitu mai hilou in, ei Khristian nu-le-
 pate'n Pasian guoljawlna i tan theina lampi ah i puihuoi zel na
 uoi chi kingaituotha chietvai.

2. Thudohna leh Dawinna:

PASTOR/UPA : Tate khu Mangpa apat i goutan leh aguoljawlna
 tah vawt a hing pieh ahi chi Lai Siengthou in a gen bang in,
 tam naungeh neitu tahtah khu Pasian ahia, noute a kentu nahi
 uh chi na theichienna uoi?

NU-LE-PA: Ingheh, ka theichien uhi.

PASTOR/UPA: Pasian thu in, Naupangte khu a neulai ua pat,
 a peina ding lampi ah chil a, zilsah ding ahi chi khu theisiem
 kawmin na thei bangbang un na zilsah ding uoi?

NU-LE-PA: Ingheh, kazilsah zel ding uhi.

PASTOR/UPA: Naungeh leh naupangte'n mit a muleh bil a
 azahte in sil a zil khe tamzaw uh chi thei in, umdan leh gamtat
 ban ah hamkam zahdan tanpha ah ettonching a um na sawm
 ding uoi?

NU-LE-PA: Ingheh, ka sawm ding uhi.

PASTOR/UPA: Malai Samuel nu in, a tapa Samuel khu
 Mangpa nnasem ding a apiekhieh ngam bang in, tam na tapa/
 tanu uh a nasem thei ding a Mangpan ahat hunhun a ding in
 phaltah in na pekhengam na ding uoi?

NU-LE-PA: Ingheh, ka pe ngam ding uhi.

3. Latna:

(Alem thei leh lantu in naungeh a khutah a pom ding a, a lemlouna munah a lutung ah a khut a ngam ding hi). Tam nausen (Amin lou kawm in) khu, Pa, Tapa leh Hagau Siengthou kung ah i laan uhi. Ama i Pasion bangkimbawlthei in guoljawl in humbitta hen, Amen.

(Chi'n a lan ding a, thungetna anei zom ding hi).

Ka Pa uh Pasion, sil zousie siemtu leh hinna kipatna na hia, Nangma'n tam nausen Na'ng piehna tung ah Na min ka'ng pahtawi uhi. A pienna nu-le-pa zong damtheina pie a, suon-le-pah a na guoljawl jieh in nuomthu kang gen uhi. Tam naungeh a dam sung tengin na Hagau in umpi zing inlen, a naupan sung in zauhuoi bangkim lah ah humbit ta in. A hing khantou zel a nungah/tangval dingkuon a hing hi chieng in zong solna leh hasatna mun ah veng inlen, nangma lampi zui thei zing dingin panpi in. Jesu Khrist a hundampa a pom a, a kung a kipekhe thei dingin na hoina a tung ah sungbuo in aw. Mangpa, tuachia Jesu Khrist hatna leh hattuumte kipawlkhawmna siengthou a Khanglien thei ding in susiengthou inlen, ama enkoltu nu-le-pate zong pilna leh lemtheina pie in, Mangpa Jesu min in ka hing ngen hi, Amen.

2.3. BAPTISMA

1. Pastor: Pasion chibai buh va-ui, “Tua ahichieng in ka unaute aw, Pasionin ei khotuo jieh in na kung uah tam ngetna ka hing bawl hi. Pasion ah kithoina hing leh siengthou bang a kitulut in, Ama kipahna lam bawl ding in noumau hing kipumpieh ta un. Tampen biehn dihtah Ama na pieh lawmmawng uh ahi.”

AHISIH LEH

“Tuajiehin, lungsietna mun Pasion Mangtouna khu hangsantah in naitinten va-ui. Khunah i tahsap dung zuiin lungsietna leh khotuona i mu ding uhi” (Heb.4:16). Mangpa'n a thu eite zousie a ding in hing guoljawlta hen, Amen.

2. Laa: Ahun toh kituoh la khat mipi'n sah ding ahi.

3. Thumna: (Pasian kung a kikhopna latna nei ding ahi).

4. Thupuon:

Thupuon ding dangte leh Baptisma tang dingte min sim khietna nei ding ahi.

5. Lai Siengthou simna:

6. Thugenna:

7. Pastor in tam bang in a gen ding a:

Tam khovel a hing pieng ta pou khelna leh shina suoh a um ahi ua; hinanleh Pasian lungsietna ah khum atapa Jesu Khrist i Mangpa leh hundampa ding a shi a thoukiapa jieh in khel ngaidamna leh kumtawn hinna a hingpie hi. Hagau Siengthou a i pienthana ah Pasian toh kizopna i hing neita ua, tuami pienthana leh kizopna chiemtena ding in i Mangpa'n Baptisma a siem a, muthei a chiemtena hiding in asiem hi. I Mangpa'n tam Baptisma Sacrament a siemkhiat lai a, a thugen khu i na ngaikhe ding uhi: "Lei leh Van a thuneina zousie ka kung ah pieh ahita a, tuachi'n pei unlen, Pa, Tapa leh Hagau Siengthou min in Baptis unlen, ka thupieh zousie zop ding in jilsah un. Tuachi'n ngai-un leitung tawp tanpha in na kung uah ka um zing ding hi" a chi hi.

Tuachi'n tam Baptisma Sacrament in Khrist a i Kiphudetnate, sisan zal a khel ngaidamnate, Hagau a pienthanate, ta hi ding a pomnate, Kumtawn hinna tang ding a thawkianate ensahin, a namdet a, a chiemte hi.

8. Naupangte atang ding a umleh tambang in agen ding hi:-

Naupangte'n tambang thute (baptisma) a theisiem nai sih uhi. Hinanleh, lungsietna thuhun a mi leh thuchiem goulutute ahi uhi. I Mangpa Jesu ngeiin, "Naupang neuta ka kung ah hing peisah unlen, khamsih un, Pasian gam khu tam bang mite a ding ahingal a," achi hi.

Tambang in, naupang neuten lungsietna thuhun a mi, ginna innkuonpite tui a die a, chiemtena baptisma ngei khu agouluo uh a hisam hi.

9. Thumna:

“Aw, Mangpa Pasion, bangkimbawlthei, Israelte vengtu, na chitelte Aigupta a pat puidoh in, a kung uah thu nachiemta hi. Tuin zong Mangpa aw, na mite tung ah zangai inlen, tam mite na thupieh baptisma a hing lut dingte pom inlen, lungsietna thuhun ah khun khelna lah a tatkhietna na chiem khu a tantheina ding un na pomta in. Jesu Khrist min in ka hing ngen hi. Amen.

10. Pastor in tangbangin dawnsa anei ding hi:

“Na ta/tu uh a hing khanlet a, a hing pichin tan in i Mangpa Jesu Khrist ginna a mapui leh a thu zilsah ding na chiemngam uoi le? (Naupang nu-le-pa, ahisihleh api-le-pu/akemtu/enkoltu’n) “Chiem ngam” a chi ding uhi”

11. Baptisma tansahna:

“Tuajiehin nang (Amin gen).....
Pa toh, Tapa toh Hagau Siengthou min in ka’ng baptis hi. Khum Pasion khu kumtawn in na Pasion hing hi in, na tung ah Nibanga tang in hing guoljawl ta hen.”chi in thumvei Pa leh Tapa leh Hagau Siengthou min in tui a tap dinga, atawpna ah mipiten “**Amen**” ana chi ding uhi (*Pastor in a thusam toh kituoh in a lutung ah tui thumvei a tahsah ding hi*).

(PICHING BAPTISMA TANG DINGTE KUNG AH)

12. Pastor in:

“Na damsungteng in, a nuom ah zong, a hasat hun in zong, i Mangpa Jesu kilepsanlou in ka zui ding chi’n thu nachiem ngam ei?”

Baptisma tang ding pen in: “Ingheh ka chiem ngam hi”

13. Baptisma tansahna:

Na damsung in anuom ah jong ahamsa ah jong i Mangpa Jesu Khrist khu kilepsanlou a jui ding a thuchiem na nei tah jiehin Pa toh, Tapa toh Hagau Siengthou minin kang Baptis ahi. Khum Pasian khu kumtawn in na Pasian hihen len, na tung ah ni bang a tangin hing guoljawl taken. *(Pastor in a thusam toh kituoh in thumvei tui a lutung ah a tahsah ding hi)*

14. Thumsahna:

“Aw Mangpa ka Pasian, ka Mangpa Jesu thupieh bang in tam ka unaupa/unaunu uh na thuhun a hing lut dingin Baptisma siengthou ah ka hinglan kheta ua/a, ama/amanu/amaute leh a nu-le-pate susiengthou in, Ka Mangpa Jesu uh gingu leh ginumtah a zuite ahithe nading un panpi in, puihuoitah len, tuami a ding in nu-le-pate leh hattuumte zong hing panpi ta’n chi’n Mangpa Jesu minin kang ngen hi,” Amen.

(Pichingte a dia ngetsahna)

“Na mite hiding in tam ka unau/unaute baptisma siengthou ah kang lankhie a, ama/amau Khrist a siem bukima ahing um theina ding in, Na HagauSiengthou in umpi zing ta’n. Mangpa Jesu min in kang ngen hi: Amen.!!!

15. Phatna Laa: Mipi’n phatna laa khat sah ding ahi.

16. Tawpna: Mangbiehna/Guoljawlna.

Note: Baptisma tangte dinna mun khu mun kiching deu ahiding a, aminte uh a kigiel bang in amaute a kiguol zel ding ua, Hattuum Secretary in Baptisma bawl dingte min tawi in Pastor a kithuopi ding a, a min uh a na gen khietsah zel ding hi. Baptisma bawllai ahilou leh a thumsahna nei ding chieng a mipite dinsah ahoiding hi.

2.4. MANGPA NITAH-ANN (SAKRAMENT)

A. AHINA LEH UMDAN

- i) Mangpa Nitah Annkuong, Kipawlina Siengthou (Holy Communion) pen Mangpa thupieh zopna leh Khristiante kipawlina siengthou ahia, innkuon annkuong zong ahi. (Luk.22:19,20; IKor. 11:23-25). Baptisma tangsa leh thunun a umloute'n a imm ding uh ahi.
- ii) Mangpa Nitah annkuong a kizang tanghou leh uai-in (greptui) in Mangpa Tahsa (pumpi) leh a sisan a ensah hi. Khum tahsa eite tang a pieh, i hinna leh damna ahi a, i Hagau lam ann ahi. Ama hing peikia masangsie tambang annkuong nekhawm zel ding in thu a hing pie hi. Ama thei zingna annkuong ahia, Hagaulam guoljawlna annkuong zong ahi (Jn. 6:48; I Kor. 10:16,17; I Kor.11:26).
- iii) Mangpa nitah-annkuong imm koi in zong ama-le-ama a ki-enchien ding a, a khelnate kipulah in, Pasian hepina kipahpi in zatattah leh siengthou tah in a ne in a dawn ding hi. Thangbawl a musitna toh ne a dawnte ama-le-ama siemmaw kitan in a tung ah thukhenna a kitut hi. (I Kor.11: 23-32).
- iv) Khristiante a ding in Mangpa nitah annkuong khu danzui kimna ahi, tuaban ah dan zuikimte kipawlina zong ahi.
- v) Mangpa nitah annkuong lui ding chieng in kipawlina/kithuona siengthou kikhop (Holy Communion Service) nei ding ahi. Vaiguon tuom leh sil dang toh thuoh khawma, amin pu a bawl hamham ding ahi sih a, kulmut tah a sai leh ahina toh kisai sermon tomkingen in Mangpa tahsa-le-sisan tung ah nuomthu tutna anei masa ding ahi.

B. A SAI DAN TANGPI

Mangpa tahsa-le-sisan thakhat thu a Minister, Upate leh Mipite'n a tan khawm thei uleh ahoi a, vanzah kichin louna mun ah Minister leh Upate'n a tang masa ding ua, tuazou in mipite'n a tang ding uhi.

1. Pastor: Lai Siengthou simna (Late 24; Isai:53; Jn. 6:53) ahisihleh a lemtang khat sim ding ahi)

2. Laa sahna :

3. Thumna :

4. Thupuon :

5. Thugenna (Sermon) tomkim:

6. Laa :

7. Apostle thugin ahisih leh Mangbiehna

(Upate'n maitam nai in puon hawhna a nei ding ua)

8. Pastor: I Mangpa dawkan khu kisiana dihtah leh ginna hing toh nai va-ui. I Mangpa thugen i ngaikhe ding uhi. "Nou semgim leh puohgih pawzousiete aw, ka kung ah hing peita un, Keima'n khawldamna hing pevang" a chi khu (Mt. 11:28).

"Ngaiin Keima kotbieng a ding in kot ka kiu hi. Koi in zong ka aw a zah a kot ei hon a ahileh a inn ah lut vang in ama toh ann nekhawm tavang." achi khu (Kih. 3:20),

Guolnei Joel in,"Lungkham in nalungtang bawkehna uh sulang un.Na puonsil bawkeh pen uh a hunsih hi." (Joel 2:13),achi hi.

9. Thumna: Bangkim bawlthei ka Pa uh Pasian, na tapa tang khat neisun zong itloua, kou a ding a Na hing pieh jiehin nuomthu kang gen uhi. A hinglungsiettu ka Mangpa uh, Hagaulam hinna ka nei theina ding ua Na itna zieh a Khros tung a nathuohna ka ngaituo chieng un Na kung ah nuomthu kang gen uhi. Mangpa aw na lungsietnate kou a dinga Mangpa Jesu thuohnate, Hagau Siengthou zang a Nang theitha sah kia jel jieh in nuom thu kang

tut uhi. Mangpa Pasian aw, Na guoljawlna lam-en in Na mai ah ka hing kun ua, lungsiettah in tam Sakrament (Mangpa nitah ann) zang in Nangman hing pawl inlen, tam Sakrament khu mi hatloutea ding a hatna, damloute adia damna, Siengthouloute adia sienthoua, ginglelte a ding a gindetna hing hi taken. Mangpa Jesu min in kang ngen uhi. Amen.

10. Pastor in: “Ka hing hilsawn thu khu Mangpa a kipat a ka mu ahia, Mangpa Jesu khu matsah a a um ding jan in tanghou ala a, Pasian kung ah nuomthu tut in a phalsuo a, tuachin, “Tam ka tahsa ahi, nou a dia hing kipie khu. Keima nei theizingna dingun ne leng un,” achi hi.

(Tanghou phalsuo kawm in) I Mangpa thupieh bang in tami tanghou ila diing ua, phalsuo in ama i theizingna ding uleh hinna nei ding a thoukia i Mangpa i zopna leh loupitah a ahing pei kia ngahlatah leh lam-etna hing toh ngahtu ihi theina ding un Mangpa’n eite hing guoljawl taken. Amen.

Pastor in: Mangpa Jesu thugen “Tam ka tahsa ahi, nou adia hing kipie khu,” chi thu gen kawmin Upate kung ah a hawm dinga, ahawm zou in Mangpa Jesu thugen gen sawn kia kawm in “I ne tading uh” *(chi in a kituoh in ane ding uhi.)*

Tuama bang in nitah-ann a nehzou un nou zong khu a la a, “Tam nou khu ka sisan a thuhun tha khu ahi. Na dawn chinteng ua nang theizingna ding un bawl leng un,” achi khu, i Mangpa thupieh bang in, tam nou khu la in i dawn ding uh. Ama i theizingna ding leh Hagau Siengthou pawlna i tan zing theina dingun Mangpan i bawn ua ding in hing guolzawl taken. Amen.

(Pastor in Mangpa Jesu thugen khu gen sawn jel in Upate kungah nou khu a hawm khe zel diinga, a hawm zou chieng in Jesu thugen genkhe zel kawm in “I dawn chiet tadiing uh” achi dinga, a kituoh in a dawn ding uhi).

(Upate'n a hawm zom jel lai un Pastor in)

“Tua Tanghou na neh ua, tua nou a uai-in na dawn chinteng un Mangpa hing pei kia masangsie Ashina khu puongjah na hi zing uhi” a chi zel ding hi.

(Upaten a hawm zou chiengun, Pastor in koitobang piehkhiekhah/tang khalou a um ei chiin hun a hong ding a, tuabang a um sihleh Upate'n puon a khukia tading uhi.)

11. Thumna:

Nuomthu tutna, kikauna leh guoljawl ngetsahna thumna Pastor ahisih leh Upa khat in a nei ding hi.

12. Lasahna:

Mipin phatna laa ahuntoh kituoh khat sah ahiding hi.

13. Tawpna:

Mangbiehna/Guoljawlna.

N.B: (Mangpa annsieng sai ahi chieng in tuonvai Upate'n pilvangtah leh jabawl siemtah in nna a sem ding ua, Siempu/ Pastor khut apat hilou amau thu in ala un a koi kia ding uh ahisih hi. Tanghou hi in Uain nou hileh adop chieng un khut lang ni a zang ding ua, jabawltah in a peipi/hawm ding uhi. A bawlchieng uleh a suhsieng kia chieng un zong midang panglou in Upa tuonvaiten aval umte susieng in, kuong leh noute zong amau khut mama in a susieng un a kem hoi zel ding uhi).

2.5. UPA NAMDETNA

Hattuum in Presbytery phalna leh makaina a Upa hiding a, a telching mite laivuonna siemsah ahiding hi. Atangpi in Khantanhoi bu lite, Thunun daante, Thuginte leh Sakrament thute tungton in laivuonna neisah ahiding a, a result Presbytery khawmpi in pha asah leh Pasian ni zing kikhopna ah namdet ahiding hi. (Namdet ding mi khat ahileh kammal zah dan siem lem ahi jel ding hi).

1. Moderator:

Kipah kawm in Mangpa nna sem unlen; Lasa kawm in amasang ah hingpei un. Amen.

2. Lai Siengthou simna:

Matt. 5:1-16; Eph. 1:5-23; I Pet. 5:1-11.

3. Thupieh khaikhawmna:

Mak. 12:29-31 (Mipi ding a simkhawm ding ahi)

4. Mangbiehna:**5. Hattuum thugin sawmte simkhietna:**

(Secretary in anei ding hi)

Moderator: Ama/Amauh (Amin uh lou kawm/lam kawm in) khu i Hattuum uh Upa hiding in i namdet ding uh ahia, (Secretary lam en kawm in) amaute Hattuum dan dihtah a telching ahi chiet na uoi?

Secretary: (Ding kawm in) Hi e, amaute khu Hattuum Upa hiding in i Hattuum dan dihtah a telching ahi uh chi khawmpi ka theisah hi achi ding hi.

(Namdet dingte a ding diing ua, tam dohnate doh ahiding hi)

1. I Hattuum thugin sawmte leh a thunun dante khu Pasian thu bu kizilsahna dihtah in na pomdet ei?
2. I Hattuum dan bupi (Constitution) khu Hattuumte kipuihuoina dan diing in na pomdet ei?
3. Hagau Siengthou leh Hattuum in ang hat bang in Hattuum Upa nna khu ginumtah a sep jel na sawm tahtah ei?

6. Upa namdetsa kitel kiate puonkhietna:

Upa namdetna tangsa, hattuum dang khat in a tel thate Khawmpi in tua a kitel thana hattuum Upa ding a puonkhiet ding ahia, tambang in:

Nang ,
 Presbytery sunga hattuum Upa na hita
 chi tuni Presbytery Session thuneina toh ka phuong hi.

7. Namdetna:

(Mipite a ding diing ua, namdetna tang dingte khu a khupdin dingua, a lutung ua khut ngam zel kawm in tambang in a gen ding hi.)

Mangpa Jesu Khrist, Hattuumte lamkai leh lupen min in leh tam Presbytery Vaihawmna (session) thuneina in, Nang (Amin gen) khu Presbytery sung a Hattuum Upa hiding in kang namdet uhi.

Tam nnasep khu thanuomtah a na muolsuo theina diing in, Mangpa hinkhuo leh Khantan gen khe kia ding na hi bang in thanuom tah in sem in. I Mangpa Jesu Khrist lungsietna na tung ah um taken. Amen, chi in a namdet ding ahi.

Certificate piehkhietna

8. Namdet zou in:

Nasemmi zumna ding neilou bang in Pasian pomtah hiding a nangma kipe ding in theitawp suo in kizil in.

Tu in unaute aw, Pasian leh alungsietna khut ah kang kemsaha; tua khun a hing suthupi thei in misiengthoute lah ah goutan ahing neisah thei ngei ding hi, Amen. Chi kawm in chibai a buh ding a, Moderator lui tengin zong a buh ding uhi.

9. Thumna:

Aw, Mangpa Hattuumte tahsapna theisiem kawm in na na em ding in na mite na han zel a, tuni hun a tam ka unaute na hanta, na nasem ding a a kipieh ma bangua mawpuohna pieh thei a, a umjieh un nuomthu kang gen uhi. Tam ka namdet uh na suohte tung ah Na Hagau Siengthou buoh inlen, Na hattuumte tahsap

bangjel a kimang thei ngei ding in panpi in. A pilna uleh atheina uh a kiching sih ding a, Nangman a tahsap uh pie in. Hasat hun a zong beidong mai lou ding in panpi inlen, Na silbawltheina a tung uah tungsah ta in, chi in Mangpa Jesu min in kang ngen uhi. Amen.

10. Lasahna:

11. Hanthawn thugenna:

12. Lasahna:

13. Tawpna: Mangbiehna/Guoljawlna.

2.6. PROBATIONARY PASTOR GUOTNA

Tam khu kikhop piching bang a siem ahisih a, Pro/Pastor guotna (induction) kikhop ahisihleh zong Synod Khawmpi Pasian ni zing kikhop a nei ding a ngaituo ahi. Synod Executive Committee in zong hun lemtang khat ah a bawl thei zel ding hi.

1. Lai Siengthou simna:

(Moderator in Lai Siengthou tang a kituoh khat a sim ding hi)

2. Dinsahna:

Secretary in Pro. Pastor a siemding (te) min simkhie in, mipi masang ah a dingsah ding hi).

3. Guotna/Siemna:

(Moderator in tambang in a gen ding hi)

“Synod min in nangkhu Probationary Pastor hiding in kang guot ua, tu a kipat Sakrament (Mangpa nitah Ann leh Baptisma) nasep chilousie Pastor nnasep dangte na sem thei tading hi. Na nnasep a muon huoi ding leh phatuom ngai ding in theitawp suo ta in. I Mangpa Jesu Khrist lungsietna na tung a um in, a Hagau Siengthou in hing mapui zing taken, Amen.

4. Chibai buhna: Moderator in chibai a buh ding hi.

2.7. PASTOR NAMDETNA

(Synod Moderator lui um thei teng Moderator kung lam naiin a tou ding uhi.)

1. Moderator: Mangpa suoh in kiletsah ching sihhen. Mi zousie tung ah nunnemin lamkai hoitah leh thuohhat dan siemmi hizaw hen. Tuabang mi khu'n jainemtah in ama mudate a siem hoi zaw tuh hi (II Tim.2:24, 25).

2. Thumna: Bangkim bawlthei Pa Pasian, Na hattuumte umpi a, Na nasepna guolnazawl zel jiehh in nuom thu kang gen uhi. Tu in tambang ka nasepna uh Na Hagau Siengthou a hingpawla, hing zousah ding in Mangpa Jesu min in kang ngen hi, Amen.

3. Lasahna:

4. Lai Siengthou simna:

(Matt. 5:1-16; II Kor. 4:1-12; I Tim.3:1-13; Tita 1:5-9; Eph. 4:11-16). Tam Lai Siengthou tangte lah a alemtang penpen Moderator in a simzou in thupieh khaikhawmna Mak. 12:29-31 mipi ding kawm in asim khawm ding uhi.

5. Secretary in: Hattuum thugin sawmte sim khietna a nei ding hi.

6. Moderator:

Ama ute (a min uh lam gingkawm in) khu i hattuum a belampu, Pastor hiding in namdet ding ihi ua (Secretary lam en kawm in) amau i hattuum dan dungjui a phasah leh guot ahi na uoi?

7. Secretary in:

(Ding kawm in) Hi e, tamte khu hattuum Pastor hiding a i hattuum dan dihtah bang a lemsah leh guot ahi uhi chi Khawmmpi ka theisah hi,chi'n (Namdet dingte a ding ding uhi)

8. Thuginpi dohna:

Hattuum thugin sawmte dohna nei ahiding a, a sawt senglouna ding in a tom kim a doh hivan'n, amabou i hattuum thugin dettah in a pomkip uh chi a kichet ngeingei ding ahi.

9. Dohna sutzomna:

- 1) I hattuum thugin sawmte leh thunun dante khu Pasian thu, kizilsahna dihtah hi in na pomdet ei?
- 2) I hattuum dan bu (constitution) khu hattuum kipuihuoina dan hiding in na pom det ei?
- 3) Tambang nasepna sem ding in Hagau Siengthou leh Hattuumten a hing han hi chi na kithei ei?
- 4) Hagau Siengthou leh Hattuum in a hing hat bangtah in tam nasepna khu ginumtah a sep zel na sawm ei?
- 5) Tam hattuum khawmpi nuoi ah ginumtah a um zel na sawm ei?

10. Namdetna:

Amaute a malmal a namdet ding ahia; a lemtan bang zel in namdet dingte Moderator masang ah a hing khupdin zel ding uhi. Mipite a ding diing ua, Moderator in a lutung ua khut ngam in tambang in a gen dinghi. "Mangpa Jesu Khrist, Hattuumte lamkai leh lupen min in leh tam Synod thuneina in India Gam Presbyterian Hattuum Minister hiding in Pasian in a lemgel bang a a hing hatna mun zousie a Khantanhoi gen ding leh Mangpa Sacrament nasem ding in kang namdet uhi. Tua nasep sem ding in Ama Hagau Siengthou in hing umpi in hing suhat taken", Amen, chi'n a namdet ding hi.

11. Thumna: Mangpa ka Pasian uh, lungsietna jiehin na umna leh na tenna innkuon hiding in hattuum nang phut khie a, tua na nnasem ding mite na siemkhiet zel jiehin nuom thu kang tut hi. Na hattuum a semte zousie umpi in suhat zel in aw. Tu a nami sawl ka namdet (te) uh zong na Hagau in thuom inlen, na deidan leh na lung lam a na nana a septheina ding leh hasatna

a thuoh hun a zong beidong mai lou dingin suhat inlen, na nnasepna ding asilpieh atan ama a umte suhkuongsah zing in. Na sisan a na leisa hattuumte vah ding leh puihuoi ding in ama theina leh pilna in a chin sih ding a, damtheina leh pilna pie in suhat inlen. Na gam a dinga a poimaw bang zel a sem ding in umpi zing ta'n. Mangpa Jesu min in kang ngen hi. Amen.

“Ginna kitaidemna ah theitawpsuo in pang inlen, nangma ding kumtawn hinna nga ta'n. Silbangkim ah kichingkip inlen, Gimthuoh lamah Khantanhoi thugen nahina na nasep khu sem zing in. (I Tim. 6:12; II Tim. 4:5).

Ordination Certificate piehna

12. Chibai buhna:

“Tambang nnasepna koute toh tang khawm ding in kithuona khut zietlam kang pie uhi” chi in Moderator in namdet thate chibai van in, Synod Moderator lui a um thei tengin zong chibai a buh ding uhi.

13. Lasahna:

14. Thugenna:

15. Lasahna:

16. Tawpna: Mangbiehna/Guoljawlna

2.8. PASTOR/ PROBATIONARY PASTOR KOINA KIKHOP (INDUCTION SERVICE)

Tambang kikhopna pen Pastor Pro. Pastor a umna ding mun ua va koina kikhop ahi. A umna ding mun uh hattuum biehnin a nei ding ahia, District sung a lamkaite a kim thei bang a kikhawm in, Bieltu Pastor ahilouleh Pastor dang Synod guot khat in kikhopna a pui ding hi.

1. Puitu:

Pasian bie in a thu siengthou ngaikhe va-ui, chikawm in tambang in a gen zom ding hi. Khumin Jesu'n a nuajuite kung ah, "Koi in zong ka nua a zui nuom leh ama gimthuoh khawhsahlou in, a Khros kipuoh in hing zui hen" Achi hi.

2.Thumna :

Aw, Mangpa, bangkimbawlthei, na hattuumte kem a enkol ding mi nangpieh zel jieh in nuomthu kang tut uhi. Tuabang a na mi tel tha leh na suoh, tam biel a koi thei ding ka nei man unzong ka lungdamna thu uh kang gen uhi. Tuni a ka nasep zousie uh Nangma deidan leh Na min loupina hia, namiten guoljawlna ka tanna uh hithei ding in Mangpa Jesu min in kang ngen uhi, Amen.

3. Lasahna: (A lemtang khat sah ding ahi).**4.Tanchin genna:**

Koi a um Pastor, Pro.Pastor hina leh a dinmun khawmpi in a guot dan te District Secretary in a gen ding hi.

5.Puitu: Pastor, Pro.Pastor a ding diing a, tambang in puitu in a dong ding hi.

Ama i unaupa uh khu, na Pastor, Pro.Pastor uh hidingin Synod in a guonggal a, kipahtah in sepkhawmpi in na kithuopi na ding uoi?

6. District Upa: Chairman ahilouleh Secretary in ding kawm in. Mangpa leh Hattuum khawmpi in a hing koi khu kipahtahin ka na sepkhawmpi ding uhi.

7.Puitu : (*Mipi a ding diing ua*) Unaute aw, i unaupa deitah uh khu i Synod in a guot bang in, tam biela Pastor/Pro-Pastor nna sem ding in hattuumte lutang leh neitu Jesu Khrist min in i koita uhi. Nasepna silbangkim ah semtu tha khu kithuopi chiet ding in kang ngen hi. I unau

..... khu, tami biel a guoljawlna tuntuhiding in Mangpan guoljawl taken.

(Pastor, Pro-Pastor tha leh mipite khu a touta ding uhi).

8. Lapawl : District ahilouleh Local apat.

9. Puitu : *(Pastor/Pro-Pastor lam nga kawmin)*

Pastor nna lienpen khu tami ahi, “Pasian thugente, Sacrament saite, gingtute suhhat, a nguited phawngnal, da-le-lusuunte hamuon, Khrist tahsa suhpichinte, a etkolna nuoi a um zousie kankhieha, ngaisahte, silbangkim a hattuum vaihawm dan ngaituotu khu ahi.

“Pro-Pastor ahileh Sacrament (Mangpa nitah ann leh Baptisma bawl) saina abawl thei sih dinga, tuo chilousie a ama enkoltu thuhil thumopna bang zel in Pastor nna asem ding” chi gen khah ngeingei ding ahi.

“Na lah ua mithupi hiding ut pouma khu nasemtu ahizawh ding ahi. Mihing tapa hilhiel zong nasepsah aum ding in a hing pei sih a, nasem ding leh mi tampite tatna ding a a hinna peding in a hingpei ahizaw hi.”

“Mihing leh mishite tungtang ngaituo ding Pasian leh Khrist Jesu mitmu ngel in; Ang kihilna leh a gamsung in phattuum ngaitah in kang theisah hi. Thu khu hil inlen, ahun ah zong, a hunlou ah zong sem zel in; eima tungthu gen hilou in, Khrist khu Mangpa ahi thu i genzaw uhi.

10. Lasahna :

11. Pastor/Pro-Pastor tha : Puitu in hantawnna thu a gennate ah Pasian mapuina toh a mawpuohna suhpichin a tup poimaw a sah thu tamlou genna a nei ding hi.

12. Thumsahna :

13. Lapawl :

14.Lasahna :**15. Tawpna :** Mangbiehna/Guoljawlna.**2.9. MISSIONARY SAWLKHIEH KIKHOPNA**

Thumapui: Missionary i chite uh ahileh Mission Field-a semtute, India gam sung leh gam polang a semtute huopin imang leng uhi. A tangpi in Missionary sawlkhieh kikhawp khu Mission and Evangelism Committeete panlahna toh Mission Conference chieng in akibawl leng hi.

KIKHOP VAIGUON**Pasian beding a chielna:**

1.Puitu: Aw hing pei unlen chibai buh ding in amai ah ikun ding uhi. MANGPA, hing siemtu masang ah i khupdin ding uhi.

2. Bible simna: Isai 6:6-8 (leh adang a lemtang khat sim in).

3.Lasahna:

4.Mellana: Missionary kuon dingte khu a min leh ahina uh puonkhieh hileh.

5.Missionaryte apat thugenna: Missionary isawl dingte khu khat sang a tam jaw ahileh amaute sih-le-tang in mi khat in thugenna nei leh

6.Sawlkhiehna:

A sawlkhietu ding a kiguot Moderator in: “ I Mangpa Jesu Khrist, Hattuum Puitu leh Lu pen min in leh Zou Synod sih-le-tangin Nang/Noute missionary nnasem ding in kang sawl khie uhi. Na nasepna mun ua mite a ding a guolzawlna hiding in Pasian in hing guolzawl taken.

7. Mipin : Amen**8. Lapawl:**

9. Thugenna: Akiguot penpen in tomkim in a gen ding hi.

10.Lasahna: Ahun toh kituoh in sah hileh

11.Topna: Mangbiehna/Guoljawlna

2.10. KITENNA

Kiteng dingte toh kisai gen nuom a umleh chia, Local Hattuumin kinunna Danbu gen bangtah a lai a natah pen peisuo ahileh kitenna mun ah mipite kung a dohna bangma ngainawnlou bang a ngai ahi. Kiten hunpen zingmawng, sun leh nitah ahithei chiet a, kiteng dingte leh hattuum lamkaite kihoulemna bang a ajangkhai theilam a bawl a hoipen hi.

1. Minister:

Unaute aw, tuni hun leh dahkal in tam i unaute uh kinungsah ding in Pasian masang ah i hing peikhawm ua, tambang a kinunna khu mihingte umdan ding mawng in Pasian in ana guonggal ahi, chi thei va-ui. I Lai Siengthou in. mi zousie kinunna pahtawi ding in a hing thuhil hi. I Mangpa Jesu'n zong Kana khuo a kinunna a zoupi in, a pahtawi ahi chi i thei hi. (Lai Siengthou sim zom ding, Mak 10:6-9).

Tuajiehin, kinunna khu ngaituo chien masalou leh kituploutah a bawl ding ahisih hi. Pasian in kinunna a guotna jiehte ngaituo in, thungetna toh Pasian dong zel kawm a bawl ding ahi. Pasian in kinunna a guotna jiehte khu:

- i) Nupa khu a damkhawm sung ua um khawm ding leh lungngaini leh kipahni a kihamuontuo a, kipanpi tuo ding in a guot hi.
- ii) A kideina uh leh a kilungsietna uh Pasian in a suhsiengthou a, a puihoi theina ding a guot a hi.
- iii) Ta-le-nau, guoljawlna a tante uh Pasian loupina ding a i Mangpa Jesu Khrist theina a a pui pichin theina ding ua guot ahi.
- iv. Khristian innkuon siem ding leh tunding diing zong Khristiante kitenna in atup-le-angim ahi hi Tambangtah a umzie nei a kiteng ding in i unau tegel uh a hing pei uhi.

2. Lasahna :**3. Lai Siengthou sim leh thugenna :****4. Kitensahna : (Kiteng diingte dingva un).****Minister :**

Tu in na nigel un ka'ng hil nahi uhi. "Langlou ding a phuol bangma a um sih a, theilou ding a phuol zong bangma a um sih," Mangpa Jesu'n a chi hi. Tunua bang hun chieng amakhat ah phuol mang a umle-zong a hing kilang thouthou ding ahi hi. Tuajiehin, tu in Pasian min a na kinunna ding uh a lemlouna a umleh nouma ngel in na puongkhe ding uhi.

Puon ding bangma na neilou ua ahileh, kinunna thuchiem na bawl ding uh ahi. (Kinung dingte tambang in thuchiem bawl in Minister gen bang in a zui ding uhi).

Pasal:

Keileh....., khu
Pasian min a ka kinunna ding uh alemlouna bangma a um sih hi.

Numei :

Kei leh..... khu
Pasian min a ka kinunna ding uh a lemlouna bangma a um sih hi.

Minister: (Pasal kung ah hichin adong ding hi)

Nang Pasian min in ka hing dong hi. Ama khu, na zi tahtah hidingin, Pasian dan siengthou bang zela nei in, anuom a zong, ahasa ah zong, a damthei hun leh a veisiet hunin zong, ama mai lungsiet in ama a dingmai a kikem siengthou in, na damkhawm sung un ji in na nei na diei?

Pasal in :

Ing, Ka nei ding hi.

Minister:

(Numei kung ah zong hichin adong ding hi)

Nang Pasion min in kang dong hi.

Ama khu, na pasal tahtah hiding in, Pasion dan siengthou bang zela nei in, a nuom ah zong, ahamsa ah zong, a damthei hun leh a veisiet hunin zong, ama mai lungsiet in ama a ding mai a kikem siengthou in, na damkhawm sung un pasal in na nei na diei?

Numei in : Ing, Ka nei ding hi.

Minister: (Khut zietlam tuoh kitusah in).

Pasal : Keiin, nang
..... ka zi hiding in, a nuom ah zong, ahamsa ah zong, damthei hun leh veisiet hun in zong, shina in a hing khen masang, ittah a hing enkol leh na nna hing sepsah ding in, tunia kipat Pasion dan bang zel in kahing neita chi ka'ng theisah hi.

Numei: Kei in, nang
..... ka pasal hiding in, a nuom ah zong, ahamsa ah zong, damthei hun leh veisiet hun a zong, shina in a hing khen masang, ittah a hing enkol leh na nna hing sepsah ding in, tunia kipat Pasion dan bang zel in kahing neita chi ka'ng theisah hi.

(Khutsip kipieh ding a nei uleh, kibusahna).

(Khut veilam kitutuo uhen len, anuoi a bang in thusam a nei ding uhi).

Pasal :

Pasion dan siengthou bang zel in ka hing neita chi etsahna leh theizingna in tam khutsip kahing pie hi.

Numei :

Pasion dan siengthou bang zel in ka hing neita chi etsahna ding leh theizingna ding in tam khutsip kahing pie hi.

Minister : (Mipite a ding diing ua).

Tu in leh Pasian dan siengthou bangzela kinung ding in Pasian leh ahattuomte masang ah thu a chiemta ua, tuamabang in, i gam dan leh Pasian dan Siengthou bangzel in nupa ahita uh chi ka puong hi. (A khut zietlam tuoh uh domsangkawm in tambang in a gen zom zel ding hi). Pasian in a gawmsa khu mihing in khen sih hen. Mangpa'n guoljawl in umpi jingta hen, Amen.

5. Thumna : Aw, lungsiettu ka Pasian uh, lei-le-van a innkuon zousie siemtu leh enkoltu. Tam nupate tung ah na guoljawlna hing vua in, aw. Athuchiem bang ngei ua nupa ginum, tahsa-le-lungsim a pumkhat, kilungsiettuo zingkawm a kienkoltuo a, a um kumkhuo theina ding un panpi in, Mangpa Jesu minin ka'ng ngen hi, Amen.

(A lutung ua khut ngam in tambangin guoljawlna a ngetsah ding hi).

Pa, Tapa leh Hagau Siengthou in hing humbit in, hing guoljawl henlen. Tam leitung leh ang um ding leitung tan a tangtawn hinna nei a, na um theina ding un, Amen.

Chibai buhna: Kitengsahtu in Hattuum min in kipahpina chibai abuh ding a, amasapen in mou aban ah moupa aban sawn ah mou lawm leh moupa lawm a chibai ding hi.

6. Min gielna : Nupa thate leh amau theipi a hing ding numei leh pasal in min gielna nei zomva un, atawpna ah agawmtu Minister in a giel ding hi. Kinunna Certificate zong pieh khiet ngal ahiding.

7. Lasahna :

8. Tawpna : Mangbiehna/Guoljawlna.

2.11. MISHI VUINA: Hattuum sung a member khat in shina a tuoh chiengin ahitheitan in hattuum Upate theipina toh shi dah sat ding ahi. A khosung/veng sung tawndan zui kawm a hattuum in thu-le-laa a mishi innkuonpите suunpina/galna nei ding ahi. A shi zounua a kapte kaazou hunlemtang masa a hun tomnou zah a, Pasian kung a thumpiehna nei ding ahi. Tuachia amun-le-ahun bangzel a, Upate, Biel Pastor leh Committee member um theite toh kimutuo in kiman dingdan vaiguon a bawl ngal ding uhi.

Shivuina Vaiguon: I. Innlam ah : (Mishi a zan gieh ding ahileh, zan dah 9/10 tan Upate'n lamkai a, i ngapzoulou hun zan hun khanglaite khuta pieh khiet ahoi hi. Zingkal mataha hun vazahpi a, thumna toh kilatna vaneipi ahoi hi. A vuina vaiguon tam anuoi a bang ahi ding hi.

1. Puitu : Pastor/Upa ahilouleh a lemtang dang khat hihen.

2. Hunpatna

3. Pahpe piehna : (A umleh)

4. Hattuum thatang a Thugenna:

(Hattuum thatang a thugentu in - Hattuum Record a mutheite banah mishi pen in a damlai a hattuum a kizahna, a damlou sung a hattuumte'n a theikhah leh vena a nei dan a umleh a genkhah a hoi ding hi. LCC Chairman ahilouleh a lemtang ding khat in nei ding ahi. PWF leh PYF (Bawl ngai ahileh)

5. Innteh lam apat thugenna :

(A khantan tomkim leh a natdan gen in kipahtu genna toh a zou ngal ding hi).

6. Pasian thu genna : Pastor/Upa a lemtang khat in nei ding ahi.

7. Hahkhietna : Pastor/Upa lemtang khat in tam anuoi a bang in hahkhiehna a nei ding hi.

Lai Siengthou sim ding :

(Job. 14:1-5; Late 16:11: I Thess. 4:13-18; II Kor.1:3,4; Isai 40:11; I Thes. 4:18; Phil.1:21) ahilouleh a lemtang dang khat sim in (*Mi kapte tawp ngah se lou in, kisum thei bangin kisum va ui in chi in hahkhetna a bawl ding hi*).

Tambang in ahakhe ding hi. “Unaute aw, tuni-le-tu hun in i unaupa/nu uh (a min lou in) tahsa luong, Pasian thuchiem bang a lei a siem leima a suohkia theina ding in han a vui ding in tam a tenna inn apat in Pa leh Tapa leh Hagau Siengthou min in i hakhie uhi”.

8. Thumna : Aw, Mangpa, ka unaupa/nu uh ahisihleh Naupang nangma kung a khawldam ding in ahinna na lahpiehta a, tam leitung gentheina leh natna zauhuoite laha pat a hunkhie a, ginna a, a nnasep thaman mu ding a na hattah jie in na kung ah nuomthu kang gen uhi. Anuasie a innsung mite leh laina zousie kung ah tunglam a kipat hamuonna tultheilou hing pie inlen, ama banga ka shi hun uh ang tun chieng in na kung a septhaman saang theichiet ding in ka damsung nite uh simdan siem ding in hing panpi in. Ama tahsa umlou tah nua in na Hagau Siengthou in tam innsung luong inlen, hamuonna tultheilou in guoljawlta in chi’n ka Mangpa Jesu Khrist min in ka’ng thum hi, Amen.

(Pastor leh Upate, Kros Mishi min kigielna pokawm in han lamnaw in maa a pui ding ua, tuachi’n luong khu kilawmtah leh zahuoitaha puoh ahiding a, anua ah mipite’n a zui ding uhi).

9. Han lam ah: (Han lam vaiguon ahitheitan a tomkim leh jangkhai a zah hithei leh a deihuoi hi. Mishi luong hankhuh sung a koizou ahi chieng in vuitu ding in tam anuoi a bang in a pui ding hi).

10. Shi vuina :

Biel Pastor aumlou leh Upa khat in a vui ding hi.

Lai Siengthou tang sim ding – I Kor.15:42-58; Kih. 7:13-17
21:1-4; 21:1-4 ahilouleh a lemtang mundang khat sim in.

Tam bang in a gending hi. "Unaute aw, bangkimbawlthei Pa Pasian in tam i unaupa/unaunu hinna khu lah lem ana sata a; tuajieh in i Mangpa Jesu Khrist jieh a tangtawna hinna tang ding a thawkiana lemetna khu linglou a pomkip in, atahsa khu lei sung ah, lei a siem khu lei suoh kia ding in Pa toh, Tapa toh, Hagau Siengthou min in i vuita uhi"chi in a vui ding hi.

I umna lei inn suhsiet in hing um nanleh van ah inn khut a lamlou tangtawn a um ding Pasian kung ah inndet i nei chi i thei uhi. Tuachiin van apat in aw ka za a, 'Tu nua chieng in Mangpa ashisate mihampha ahiding uhi. Asepgimnate uh khawldam san tava un, a nasepsate un a hing zui ding ahingal a' Hagau in a chi hi, Amen. Gilkiel nawn tasih va un, dangtah nawn tasih va uh. Nisa'n sal nawntasih va'n, tuachin khosakai nawntasih va uh. Ajiehpén, Mangtouna laikimtah a Belamnou khu amau Belampu hitavan in, tuachiin aman hinna tuinah ah zawpi van, tuachiengin Pasian in a mit hituite uh khu siahul siengsah tava uh.

11. Thumna leh Guoljawlna: Shi vuitu

Note :

(Pastor leh Upate shi chiengin, a luong han lam a puoh ahi masang in Biehinn ah puohlut hiva'n, tuanah Presbytery lamkai na in vaiguon tomkim a nei in Lapawl a um theileh khanglaiten sa va un, tuachiin Khanglai/Tanuten a luong han lamzuon a peipi ahiding hi. Ahitheitanin shi vui nua chieng in Pastor/Upaleh lamkaiten shinua uopna nei in a ngaisah ding uhi. Handal ni chieng bang in zong amun leh a hunzil in thu leh laa a kithuo khawmna ah a lamkai ding uhi. Tambang sietni, lusuunni a Hattuum lamkaite nnasepna a poimaw in a manpha mama chi thei a, thanuomtah leh kipezoutah a kizah ding ahi).

Khiil – 3

3.1. THUNUNNA PIEHNA:

Hattuum Committee (LCC) in Hattuum sung a dan zoukimsa member koi toh bang Hattuum dan botsie a, khelna a pua mite thunun ding a a guonsa Thununna kikhop ahi. Biehna kikhopna khat pou pou a bawl thei ahia, (ahin Nilaini kikhop hithei leh) Hattuum lamkaiten aguotsa Upa/Pastor in tam kikhopna a lamkai ding hi.

1. Puitu :

“Pasian chibai buh kawm in ama be-va ui” chi kawm in anuoi a Lai Siengthou tangte khat ahisihleh a huntuh kituoh khat asim ding hi. (Thup. 3:11-15; 15:10-15; Matt. 18:15-17; Heb. 12:11)

2. Thunun piehna :

“I unau nu/pa uh.....in/ten khelna/suol a pua in Hattuum dan ana botseta a/ua, Hattuum in khawh a kisa mama hi. Tuaziehin hattuum suhsienhthou ahi theina ding leh amaute hutkhiet kia ahi theina ding un i unau/unautu khu i thunun uhi chi Hattuumte kang theisah hi. Tualeh tam thununna khu lungsietna nei kawm a bawl ahi hi. Thunun chi etsahna leh theipina in hattuum dan zoukim zousie in khut veilam tun ding ahi

3. Thumsahna :

3.2 THUNUN A UMTE LAHLUTNA

Hattuum in thunun ana piehsa, ahun achintah jieh leh amau kisiana dihtah toh Hattuum Committee a kingetna a bawl bangua Committee in lalut kia ding a, ana lemgelsate lahlutna ahia, LCC Chairman ahilouleh a kiguong Upa khat in kaihuoiin a pui ding hi.

1. Puitu :

Pasian bie in athu Siengthou i ngaikhe ding uhi (Isai 55:6,7; Jn. 6:37-40).

2. Thumna :

3. Phatna Laa :

4. Lai Siengthou sim :

Puitu in tamte lah a mun khat, mun ni a lemnan dandan in a sim ding hi. (Late 32:1-7; Rom. 8:1-4; Eph. 2:19-22; Kol. 1:10-14; 3:1-4).

5. Lahlutna:

“Unaute aw, tam i unau in/unauten Hattuum thununna hun sawttah anatuohtha a/ua, tu in kisia in Mangpa leh Hattuumte lam ah a hing kiheikiata hi/uhi. Ama/amau tungtang Hattuum Committee in ana ngaituota a, lahlut ding a kinget bang in/un lem ana sahtah mabangin tu in lahlutna i nei ding uhi.

Tu in i unaute uh..... dan sung a lahlut lem isahna etsahna in dan zoukim teng in i khut zietlam chiet dom chiet va ui, (dan zoukim teng in lahlut lem a sah nua ua kilalut thei giap ahi chi i theisa uh bang in)

6. Lahlutna:

(*Lahlut diingte ding va un*). “Tu in nang/nou ka unau/unaute uh, Jesu Khrist Hattuumte lutang leh lamkaipen min in a Hattuumten Mangpa dan leh Sacrament-te apat a Hagau lam hoina tang ding in Hattuumte kituohkhawmna bukim ah ka

hing lalut uhi. Shi tanpha in muonhuoi in um in; tuachiin hinna Manglukhu kahing pe diing hi” Mangpa Jesun achi hi. Mangpa hagau in hing umpi in hing guolzwl taken. Amen.

Chairman in hattuumte thatang in chibai a buh ding hi.

7. Hanthawinna thu :

8. Thumna: “Aw Mangpa, ka unau/unaute uh khiel kiphawh a, Nanglam kinuale thei ding a Hagau Siengthou a, ama/amau lungsim Nasuhhatsah jieh in nuom thu ka hing gen uhi. Na kung a hing pei tapou kipahpi in a khelna uh na ngaidam zel a, Na ngaidamna thu theisah inlen, susiengthou in aw. Nangma a ama/amau in a hing theina leh a hing itna suhpungsah in a tungah/uah na zangaina tungsah inlen, Nangma zau kawm a gin-umtah a Na nna sem a, kumtawn hinna a tan theina diing in/un Na Hagau Siengthou in umpi zing in chin Mangpa Jesu min in ka hing ngen hi.”

9. Phatna Laa :

10. Tawpna : Mangbiehna/Guoljawlna

3.3. PEMTE LAHLUTNA

Hattuum/khuo dang apat hing pemit miten a umna masa/lui uh Hattuum apat Pemna Lai ala ding ua, tuachin a va-umna ding uh Hattuum ah tuami lai a pelut ding uhi. Tambang hun leh dinmun ah Pemitna Hattuum in sil umdan enchien in a lahlutna ding tambangin a bawl ding uhi. Tampen a tuom mawng a kikhopna bawl vateh lou in zong kikhopna hun sung khat pou pou a guon tel thei mai ahi.

1. Pemna lai simna:

(Hattuum Secretary in a simkhe ding hi. Ahing kipatna uh hattuum leh tu a a umna ding uh Upa Biel genkhiet a kilawm ding hi).

2. Loplutna:

(Pemte a umna mun chiet uapat dinsah hi henlen. Tuachin LCC Chairman ahisih leh akiguot Upa/Pastor in) “Nang/nou....., na umna masa uh Hattuum a ginumtah a na um bang a/ua tam Hattuum a ginumtah leh hamuongtah a um ding in kang lawmlut uhi. Pasion in hingguoljawl taken. Amen

3. Thumsahna:**4. Chibai buhna:**

Chairman in Hattuum thataang in chibai a buh ding hi.

3.4. HATTUOM DANG APAT HING LUT TE LAHLUTNA:

Khosung khat apat hi in khodang apat hitaleh Hattuum Pawldang apat hing lutte lahlutna nei ahiding a, kikhopna a tuommawng a bawl thei ahisihlezong kikhopna Vaiguon sung ah tambang a zah ahiding hi. A zangtu/puitu ding in ahitheilieie leh LCC Chairman ahidiing a, a lemtaanlouna ah Pastor leh Upa ahiding hi.

1. Chairman in:

(Hattuum a lut tha dingte dingsah van) “I unau/unaute uh.....Hattuum apat in i Hattuum ah a hinglutta a/ua, Hattuumten loplutna nei ding ihi uhi.

“Tuniin nou tammi hattuum a gin-umtah leh hamuongtah a um ding in Hattuumten kipahtah in ka hing lawmlut uh chi ka hing theisah uhi. Tami Hattuum ah gin-umtah leh hamuongtah a um ding in kang deisah uhi.”

- Pasion in hing umpi in hing guolzawl taken.

2. Thumsahna:**3. Chibai buhna:**

Hattuumte thatang in Chairman in chibai buhna a nei ding hi.

.....

Khiil- 4

4.1. SUONGPHUMNA/HONNA:

Biehinn hi in Hattuum inn khat pou pou, Sanginn, Nipi-sanginn, Quarter leh adangdang lam ahidiing chieng in a kipatmasang a suongphum hon ahilouleh bawl dan dang nnasep patna ding bawlkhietna ahi. Tambang in kizahna bawlkhiet ding ahi. (Pastor, Upa leh Building Committee member-te puitu/Minister kung ah a ding diing uhi).

1. Puitu:

Unaute aw, malai a gamdai a Biehbuh lam ding Mosi kung a Pasian in thu a pieh a, a nualam hun a Israel-ten Pasian a biehnna uh Jerusalem a Solomon Biehinn lam pen a guoljawl mabang in tunin ama miten Lai Siengthou kijilsahna, thungetna, pahtawina, hutdamna thu genna leh biehnna kikhopna diing in tami mun ah, mun siengthou lam utna lungsim Pasian in a hing pie a, tuami a diinga suongphum phum/hong ding in i hing kikhawm uhi. Ama i Pasian ngel in itup-le-ngimte a pom in a innsiengthou ilam zouna diing un ahing mapui in ahing guoljawl ngei ding chi imuong ngam phot pouma ding uhi. (Lai Siengthou sim diing: Ezra3:10,11; Late 118:19-29; 127:1; Isai 28:16; Eph. 2:14-22; I Pet 1:1-10).

2. Suongphumna/Honna:

“A Biehinn/Inn Siengthou khu Pasian loupina leh agam letna ding, amite kituokhawmna mun, Hagau lam gilkielten ann a muna mun uh hiding leh Hagau Siengthou tenna mun a hing hitheina ding in Hattuumte lutang leh lamkai Jesu Khrist min in ka phum/hong hi.

3. Thumna:

Aw Pasian, bangkim bawlthei, tangtawn suongpi, tuni hunle-ni hing tung jel ding a ka lamet uh na tung ah kang nga uhi. Tam suongphum/hon tung ah na Biehinn Siengthou lam ka hing sawm ua, hing na pomsah ding in ka hing ngen uhi. Tam Inn Siengthou a dinga ka sillat uh leh ka thawlawmte uh hing guoljawlsah in aw. Tam Inn lam dingte mapui inlen, tuohsiet theina mun ahte veng inlen, Sawлтаhte leh Jawlneite suongphum tung a kilam, aning asuongphum poimawpen ka Mangpa Jesu Khrist tung a kilem ka hi theina ding un, lungsim lam a kituohtah a suhtuoh leh leptuoh ka hi theina ding un Na mite hing guoljawl in chiin Mangpa Jesu Khrist min in ka hing ngen uhi. Amen.

4.2. BIEHINN THA HONNA KIKHOP

Biehinn lamtha mai ah mipi pei khawm in, a hong ding Minister/Upa leh Upa dangte, Building Committee memberte kotbul nain a kiguol ding uhi.

1. Puitu in: Late 100:1-3 ahilouleh Isai 12:4 a sim ding a, tuazouin la sahna mipi'n a nei ding hi.

Lasahna:**2.Thumna:**

Mangpa aw, Na Biehinn lam zou thei ding a guolzawl na chintenga Na'ng vua jie in nuomthu ka'ng gen hi. Na innsiengthou toh lungsim lam siengthouna akituoh mabang in, Na mite hing susiengthou inlen, pomtah hidingin hing siem in aw. Jesu Khrist min in ka'ng ngen hi, Amen.

3. Honna:

Tu in tami Biehinn Ama biehn a ding, a nasep siengthoute sepna ding, Ama toh kipawl na ding, Ama misiengthoute kipawlkhawm nading in Pa Pasian, Tapa Pasian leh Hagau

Siengthou Pasion min in ka hong ahi. (Hongtu in tam a gen zoutoh kituoh in ribbon a teptan dinga, tuazou in Late 100:4,5 sim in biehnin kotkhah a hong ding a, kituptah leh umzie neitah a kizuilutna a um ding hi).

4. Biehnin sung ah :

(Mipi'n Pasion phatna laa a sa ding ua, tuazou in puitu in Sam 84-na a sim ding hi).

5. Biehnin latna :

(Mipi a ding diing a) "Tam Inn khu Pa, Tapa leh Hagau Siengthou i biehnin uleh i kithuokhawmna mun uh hiding in, Jesu Khrist Hundamna Khantanhoi gen jahna mun hiding in, Gingtute Mangpa thu a hamuonna leh suhhatna inn hiding in leh, Pasion gam suhdetna leh kehletna inn hiding in Pasion kung ah i lan uhi, Amen.

6. Thumna:

Mangpa Pasion aw, kipah leh kingaangiem a tuni a na khuta Na tate'n kang pieh uh hing sang inlen, tam inn a teng ding leh Na nasepna zousie haatsah a, siengthousah a, guolzawl ding in na deisahna hing pie in. Tam innsung ah Na zangaina hingmusah inlen, Hundamna, Hagaulam khanna kipahna leh muonna koute hing pie in. Bangkim a Nangma min letna diing in, Mangpa Jesu min in kang thum hi, Amen.

7. Lapawl:

8. Reportna:

(Building Committee Secretary ahilouleh a lemtang khat in Building lamna thu report a pe ding hi).

9. Thugenna:

Puitu/Minister alemtang khat in hanthawmna thugen tomkim nei leh.

10. Lasahna &Tawpna : Mangbiehna/Guoljawlna.

4.3. BIEHINN/HATTUOM THA HONNA

Hattuum khat a pat inn tuon ding, ahilouleh mun tuomtuom apat mun khat a pem khawm bang, ahilouleh Khristian a kipe tha mun khat a um khawmte hattuum a a din nuom chieng un biel (district) theipina leh malahna in hattuum tha hon ahi zel ding hi. (Tambang a hon tha hattuum, Upa dettah nei nailou leh a inntuontu ama, ahilouleh biel in a kepte Branch Church chiin Local hattuum piching lou deu in a kikoi zel hi). Hattuum tha hon ahi masang in, gentel masah ding zousie zawsa diem a koi ahiding a, Committee member ding leh nnasemtu ding (vanzah ding Upa) te guotsa a koi diem a, honzou ahi chieng a puonkhieh ding ahi.

AHONNA KIKHOP

Biehinn mai ah:

Biel Chairman/Pastor.

(Mipi ding in) “Mangpa Jesu Khrist, hattuumte lamkai leh lupen min in tam Branch Church khu Mangpa Jesu gingtute Pasian bieh khawmna ding leh Khantanhoi genna mun hiding in Pa toh Tapa toh Hagau Siengthou min in ka hong hi. Mangpa Pasian, bangkim bawlthei in tam Biehinn tha guoljawl in mapui zingta hen len, Ama hattuum gin-umtah hithei dingin lungsietna in umpi zingta hen.

Mipi’n : Amen, achi ding uhi.

(Biehinn hon zou ahi chieng in Biehinn sung ah Biehinn latna in a zui ngal ding hi.)

1. Puitu: District Chairman/Pastor.

2. Lai Siengthou simna : (Late 95:1-7 leh ahoi dang).

3. Laa : Ahun toh kituoh khat.

4. Thumna :

5. Lai Siengthou simna :**6. Apostol thugin genkhawmna :**

(Mipi ding kawm in).

7. Lai Siengthou simna :

Late 100; Eph. 2:19-22.

8. Laa :**9. A tanchin genna:**

Branch Church Local hattuum hiding a kisahkhohna leh apoimaw dangte genna, a enkol ding Upa in anei ding hi.

10. Thupuonna :

A dinmun ding leh a hina ding chiengtah a puonna nei ding ahi: Committee member ding leh thu a nasem ding-te, Sunday School, Hattuum kisimna peipi ding daante, Khanglaite leh Numei Pawlte um dingdante hattuum piching a ding thei dinga kinget ding dante uh, thawlawm asai ding dante uh a puonsah ding hi.

11. Thugenna :**12. Lasahna :****13. Tawpna : Mangbiehna/Guoljawlna.****4.4. DISTRICT THA HONNA**

India gam Presbyterian Hattuum Dan (Constitution) Bung IV: (1) a kigen bang in tambang District siemna khu Synod mawpuoh ahi. District khat mai sukha a siem ahilouleh District ni/thum apat siem khiet ahi in zong Synod lemgel bang ahi ding hi. A hongtu ding zong Synod in a guot ding hi. Amabou, District tha sung ki-etkol ding dan leh kivaipuohna ding a umna masa District-ten ana guonggalsah ding ua, Synod theipina toh kituptah a bawl ding ahi.

Tambang in:-**1. Puitu :**

Synod guot pen.

2. Lasahna :**3. Thumna :****4. Bible simna :**

Late 125; Matt. 16:13-20.

5. Apostolte thuginpi genkhawmna :

(Mipi ding kawm in)

6. Lasahna :**7. District tungtang :**

Amin leh a tanchin tomkim agenna leh puitu dingte mellana.

8. Honna :

(Mipi a ding diing ua, Puitu in tambang in a gen ding hi).

“Mangpa Jesu Khrist hattuumte lamkai leh lupen min leh Ama loupina ding in tam..... District/Bieltha ka hong hi. Pasian, bangkim bawlthei in tami district khu Ama deilam bangtah a nnasem ding in guoljawl in mapui zing taken”.

9. Mipi’n : “AMEN” chi in a touta ding uhi.**10. Thumna :**

11. Thugenna : A hongtu ma ahisihleh guot a umpen in a gen ding hi.

12. Lasahna :**13. Tawpna :**

Mangbiehna/Guoljawlna

4.5. HATTUOM NI POIMAWTE

1. Kum Tha: Hun bite leh mihingte tung a thuneina Pasion kung a nuomthu tutna leh mailam hun a ding a Pasion kung a kipieh khietna leh kikepsahna hun a zah ding ahi. Pasion nnasem ding a hinkhuo latkhietna leh Pasion khut haat tah muong kawm a ginna thuchiem bawl a zah ding ahi. Tua leh hunzah siem ding lam kijilsahna uongbawl zong ahoi ding hi. Hattuum kemtuten sep-le-bawl ding kiman ding dan bangkim abul apat et phat pai a, abul pat dih sawm ding ahi. Lai Siengthou sim ding alemtangte- (I Kor. 16:8-9, 23-25; Late 90, 100, 106; Rom 12:1-13; Eph. 4:25, 5:1-21) ahi uhi.

2. Palm Sunday: Tuumkau ni kichi, tuumna tawia Jesu a pahtawi ni uh, Mangpa Jesu guolzou a Jerusalem khopi lutni toh kisai a kimang ahi. Good Friday masang hapta khat, Pasion ni a zah zel ahi. Naupangte'n tuumna tawi in kholai ah HOSSANA a sam zel ua, a kilawm in a hoi mama hi. Hattuum in Biehinn vaiguon zah ding ahi. Lai Siengthou sim ding alemtangte (Zak. 9:9-12; Phil.2:5-11; Matt. 21:1-11; Mk. 11:1-11; Luk. 19:28-40; Jn. 12:12-19.) ahi uhi

3. Good Friday: Ningani (Thursday) jan in alem theileh Mangpa nitah annsieng hawmna nei ahoi a, a lemtan lou leh zong Pasion thu genna hun a zah ngeingei ding ahi. Ani (Friday) hun ah zong Pasion itna, a tatna leh a hundamna thute gen in a Misiengthoute laphuoh la hoi tahtah sa kawm in gingtute'n kisuhalna a man ngeingei hileh a deihuoi hi. Lai Siengthou sim dingte (Isai42:1-9, 53:1-12; I Pet. 3:17-22; Heb. 10:1-10 leh Khantanhoi thute) ahi ding hi.

4. Easter Sunday: Jesu siemtang a haan a pat a thawkiani a hia, zingmawng in sun rise service kichi a nei thei pawl a umzel a, ahoi mama ahi. Zinglam leh nitah lam biehma kikhop hoitah a bawl a, i thugin toh kisaia kijilsahna a nei ding ahi. Lai Siengthou sim dingte (Lk. 24:13-35; Jn. 20:1-10; I Kor.15:29; Kol. 3:1-11; I Pet. 1:3).

5. Penticost :

India gam sung a, Presbyterian Hattuum (PCI) ten tami ni khu thum khawm ni (Assembly day of Prayer) in a kimang zel a, thumna ding a kibawlte zui in thum khawmna nei zel a hia, gammiel nnasepna a ding silpieh khawmte a nuoi, a lakh a sim aching zel hi. Hagau Siengthou pieh a um ni ahi a, gingtute a dia ni poimawtah ahiban ah Hagau Siengthou nnasep dan, tualed gen dan chi tampi um a khute hoitah a kijilsahna nei ding ahi. Lai Siengthou sim dingte (Isai 61; Joel 2:29-32; Nas. 1:8; 2:1-41; 14:21 leh Rom 8:1-17; 15:13).

6. Missionary Day:

Kum chin May 7, khu Manipur simlam gamkai Churachandpur biel a Pasian thu hing lut pat ni dana sut a hia, hattuum chin in Missionary Day zah zel ahi. Tamni (May 7, 1910) in Mizoram apat in Missionary Watkin Roberts (sap tangval) lamkaiin mi thum, Vanzika, Taitea leh Savawmate Senvon khuo Manipur hing lut in Pasian thu hing polut uhi. Tam Missionary Day pen hattuumte'n Khantanhoi i muna jieah a kipahtu genna leh tuami Khantanhoi eikung a khawl densah mailou a, midangte kung a pieh khiet ding ahi dan genna leh kijilsah ni a i zah ding uh ahia, Pasian bieha leh silpieh lah khawmna hun hoitah a nei ding ahi. Lai Siengthou sim dingte (Isai 61:1-4; Matt. 4:12-17; Luk. 4:17-22; Jn. 1:9-14; Heb. 1:1-3) leh adang lemtangte sim ding ahi.

7. Haitha Latna:

Hattuumte i nnasep leh i nehsuina toh kisai in Haitha latna i poimaw khat uh hi in akilang hi. Israelte kung a Pasian thupiehte theisiem kawm leh dihtatna leh sienthouna toh Siemtu Pasian kung a sillatna nei ding ahi. Pasian silsiem dante, a guoljawlna pienzieta leh a Hattuumte mawpuohna sillat leh silpieh a nasepna lam gen tam a hoi hi. Lai Siengthou sim dingte (Danp. 8:11-21; Mal. 3:7-12; Matt. 6:19-21; II Kor. 8:1-9; 9:6-15).

8. Khristmas:

Mangpa Jesu pien ni, vannuoi zousiein a kipahpi bang a gingtute a ding a silthawnpieh manphapen, Pasion Tapa mihing a ang pien ni ahi. Lai Siengthou sim ding te (Luk.1:67-80; Mik. 5:2-4; Luk. 2:1-20; Isai 9:2-7; Matt. 1:18-25; Jn. 1:1-14; Heb. 1:1-12; Gal. 1:4-7) ahi.

9. Kum Lui Hahna:

December 31, Zan kikhopna ah hattuum khantan tomkim department tuomtuomte'n report henlen, kum khat sunga na shite suunna zong umleh ahoi hi. I nnasep hoiloute leh i hinkhuo man daan hoiloute siemtha thei a hitahlou dan leh hun hing tung ding a pilvang leh Pasion deidan sui kawma kisahkhol ding ahidan gen uong' hileh. Lai Siengthou sim dingte (Late15, 90; Matt. 6:25-27, 31-34; Eph.5:6-21; Heb. 3:7-15; I Pet. 3:8-12 Isai 38: 1-15) ahi uhi.

4.6 KUM CHIN SEPGUOL

Kumchin a sepguol i nei jeljel pen uh 12th Synod Session phasah bang in Sepguol Vaiguon bawltu ding Synod in guot zel ahia, tua dungzui in Hattuum chin in eima lemtan bang leh lawching thei ding en in zah ahi zel ding hi. Nitah chin Biehinn kai ahiei, Innsuon ve ahiei a zah ahia, Silpieh tawikhawm a District a Sepguol kisuhtuona nei ahi.

.....

Khiił- 5

5.1. PIENNI (BIRTH DAY) LOPNA

Pienni (birth day) ang tun chieng in a nuom thei pen in hun kijang tangpi hi. Pasion mapuina toh i pienni hing tung thei ahijiehin Ama tung ah kipahtu genna leh nu-le-pa hing suongtu/hingtute kung a kipahtu genna ahideu pen hi.

Kikhop Vaiguon

1. Puitu:

Amasa in nabawn un Mangpa Jesu minin chibai ka hing buh hi. Tuni/tuzanin in i unau nu/pa pienni lawm ding in ihing peikhawm ua, tuni apien ni _____ veina ahi. Tam bang a hun hoi-le-manpha hing petu Pasion min i phat masa uhi. Amen.

2. Bible simna:

Puitu. Late 23:1-4, Phil. 4.4-7, Late 136:1-9; Late 100:1-5 amaw ahisih leh a lemtang dang khat isim ding uhi.

3. Kipah thugenna dingte:

- Nu-le-pa ang pieh ziehin
- Mihing a ang piensah ziehin
- I pien apat tuni dong hing kem in ang ven jieh in
- I hinkhuo a itahsap zousie ang pieh jieh in
- I Khelnate kisia in ngaidam ngen in tualah mailam ah gamta khiel non lou ding in a kung a ki-ap khieh ding ahi.

4. Thumna:**5. Lasahna:****6. Thugenna innsung mite akipat in:****7. Thugenna (Short message):**

Tam Bible tangte pan san in gen hi leh Late 90: 12; 134: 9-15;
37:1-5; Matt.6:25034; Phil. 4:4-9; Heb.13:1-7, leh adangdang

8. Thugen ut dang :

Minute nga vel genna nei ding ahi

9. Lasahna:

A lemtang la khat sah hileh

10. Tawpna:

Mangbiehna/Guoljawlna

5.2. NAUMIN PHUONA

Leitung ah a tangpi in ha 7 ahisih leh ha 9 in nusung pan in naungeh ang pieng hi. Ang pien nua in a kihatna ding min neilouin sawtpi kikoi nuom lou hi. I Mangpa Jesu ngel jong a pien masang in amin ding kiphuoh zouta hi. Tamte zieh adieimah tulaiin zong nau ang pienleh a min phuo ding kingai thupi in ki ngahla mama hi. Eite lah ah zong naungeh ang pien masang in ta/tu min ding jong kima gen thei hi.

- Biel Upa in mawpuohna leh Puitu hina la theileh a hoi ding hi.
- Innsung miten naumin genkhietna anei ding uhi.
- Nausen min latna leh thumsahna
- Hun zawna

Tualeh nau min phuoh chieng a Bible sim dingte: Siem. 4:25; I Sam. 1:20; Late 72:17; Isai 62:2; Matt.1: 25; Luk 1: 57-63 leh adangdangte sim ding ahi.

5.3. LAWCHINNA VAIGUON

1. Puitu:

Tunin/tuzanin i unaute innsung ah Pasian guoljawlna tha lawchinna dei umtah ahing tun ziehin Pasian kung ah kipah thu genna hunte ineikhawm ding uhi. I bawn un Pasian toh kipawlna nei va-ui. Tam Bible tangte sim hi leh I Khang.29:11-13; Thup. 6:6-11; 10:5,6; II Thes.3:6-12; Luk 12::27:32 leh adang dang

2. Hunpat thumna :

3. Lasahna

4.Thugenna : Innsung mite apatin

5. Thugenna :

6. Special No:

Aumthei ding leh

7. Topna:

Mangbiehna/Guoljawlna

5.4. KAISAN LOPNA (PROMOTION)

1. Puitu:

Tuni/tuzanin hun kipah umtah a ilawp uh khu Pasian guoljawlna jieh ahi amin loup i iphat masa uhi. Bible sim ding te (Thupilte 3:1-4; Siem. 41:38-45; Danp. 31:1-8; I Leengte 3:5-15; Dan. 2:46-49; Phil. 4:4-7)

2. Thumna:

Kaisan jieh a thumsahna nei hileh

3. Lasahna:

Athu toh kituoh in laa khat sah hileh

4. Thugenna:

Innkuonte sih-le-tang in

5. Special No:**6. Thugenna:**

Department lam a mi amaw alemtang khat in minute 5 vel gen hi leh

7. Topna lasahna:**8. Topna:**

Mangbiehna/Guoljawlna

5.5. KITENNA NI LAWPNA VAIGUON

Thupatna: Kitenna ni Jubilee atangpi a kilawmte tamte ahi deu hi. Silver Jubilee (kum 25 chinna), Golden Jubilee (kum 50 chinna), Diamond Jubilee (kum 60- chinnate) leh Platinum Jubilee (Kum 75 chinna)te ahi hi.

Kikhop Vaiguon**1. Puitu:**

Tuni/tuzan in i unaute uh kiten ni/champha lawm ding in ihing peikhawm uhi. Tambang a hun hoi hing petu Pasian min iphat masa uhi. Bible sim ding te: Heb.13:4; Eph.5:22-24; I Peter 3:1-7; Thup. 3:5-9; 15:1-3; Siem. 2:18-24; Late 13:25-28; 90:1,2,12; 127:1-5; Thup. 14:26-27; 15:17;31:30; Eph.5:22-23.

2. Hunpat thumna:**3. Lasahna :****4. Thugenna tomkim :**

Innsung mite apatin

5. Special No:**6. Thugenna:**

Tawmkim leh umzie nei a gen ding ahi.

7. Thumsahna:

Pastor/Upa kiguot penpen in anei ding hi.

8. Lasahna:**9. Topna thumna:**

Mangbiehna/Guoljawlna

5.6. JUBILEE LOPNA

Jubilee lawp ding leh lawmtu ding chi tuomtuom aumthei a, hattuumte, Pawl (Association/Organisation) te, mimal leh innkuonte, nupate leh adangdangten Jubilee alawp deute uh tamte ahi uhi.

1. Silver Jubilee (Kum 25 chinna)
2. Ruby Jubilee (Kum 40 chinna)
3. Golden Jubilee, (Kum 50 chinna)
4. Diamond Jubilee, (Kum 60- china)
5. Platinum Jubilee (Kum 75 chinna)
6. Centenary Jubilee (Kum 100 chinna)
7. Quasqui Centennial Jubilee (Kum 125 chinna)
8. Sesqui Centennial Jubilee (Kum 150 chinna)
9. Quartosept Centennial Jubilee (Kum 175 chinna)
10. Bi Centennial Jubilee (Kum 200 chinna)
11. Quin Centennial Jubilee (Kum 500 chinna)
12. Millenial Jubilee (kum 1000 chinna) te ahi hi.

Kikhop Vaiguon**1.Puitu:**

Tuni/tuzan in hun poimaw tah hing tungsah/petu Pasion min i phat masa uhi. Na bawnpi un Jubilee chibai ka hing buh masa hi. (Jubilee a loppin uh tawmkim tahin ahil chien ding ahi) Tuachin tam Bible tang te asim ding hi. Siemp.25: 8-17; 25: 28,39-43; Late 100:1-5; 135:1-9;23-26; Matt.5:1-10; Luk.12:22-31; Jn. 17:15-26; Rom. 13:8-10; Phil.4:4-9 leh adang dangte

2.Thumna :**3.Reportna:**

A lawmtu penpen in tawmkim in report ape ding hi.

4.Lasahna :

Ahun toh kituoh in la tel ding ahi

5.Thugenna: A gen ding a kilawm khat in thugenna anei ding hi

6.Lapawl : Jubilee lapawl amaw mimal lasahna aum leh

7.Lasahna:

8.Topna: Mangbiehna/Guoljawlna

5.7. INN THA HONNA/LATNA

1.Inn mai ah: Inn tha hawng/latna nei ding ahichieng in mipite inn mai a kingah khawm in la khat sah hithei leh ahoi ding hi. Tualeh akhenten ribbon te ding zong abawl pawl a um ua, tampen inneite kisingsah dandan ahiding hi. Ahongtu ding Upa/Pastor ding penpen in, tuni/tujan in i unaute leh Manggam a isepkhawmpite uh..... innkuonten inn hoi tah alam uh khu Pasion kung a lan ding ang chiel ua tamza ipeikhawm uhi. Ahongtu ding in tam Bible tangte simna (Late 127:1; Danp. 20:5; Isai 65:21, Jer.29:5) te sim in Inn honna nei in a sungah mipi lutin innlatna a nei zom ngal ding hi.

2.Lasahna :

3.Thugenna: Inn neite apatin Pasian kung a kipahthu genna leh inn lam dan tangpi leh sum-le-pai lut ja bang ngaikhieh thei hileh ahoi ding hi

4.Thugenna tawmkim:

Minute 3-5, kikal agen nuomte ding in hun hon hi leh

5.Topna: Mangbiehna/Guoljawlna**5.8. HANSUONG HONNA VAIGUON**

Hansuong hawwna nei hun chieng in akitupthei pen leh atomthei bang a hun jah ding ahi.

1. Puitu:

Bible sim ding te. Jn. 11:25; Job. 19:25-27; Late 30:5-12; 130: Isai 40:11; Jn. 11:25-26; 19:5,25; I Kor.15:20-29,35-38; II Kor.5:1; 2 Thes.5:23; Kih.7:9-17.

2. Lasahna:**3. Suong hawwna:**

Upa/Pastor in tuin tami suong khu _____
(Amin gen in) thei gigena hiding leh tukhang ta khang a amin man maw na suong hiding in, Pa toh, Tapa toh, Hagau siengthou min in ka hong ahi. Tuazou chieng in asuong kigielte sim in thumna toh azou ding hi.

4. Pahpiehna in ajuj ding hi.**5. Inn neilam apat thugenna:****6. Lasahna :****7. Topna:**

Mangbiehna/Guoljawlna

.....

Khiil- 6

6.1. BIEHINN SUNG A VANZAhte

1. Pulpit Kizahna:

Pulpit khu ja bawl ding ahia, thugentu chiloungal in aluo diing ahisih a, kengdap zong sutkhiet ahoi hi.

2. Puitu Touna:

Biehinna kai chieng in Puitu khu Pulpit mai laikimtah ah a tou diing hi. Amabou Hattuum Vaiguon poimaw a um leh LCC Lai-at ahisihleh Recording Secretary khatin a toupi diing hi.

3. Lectern:

Lactern khu silpieh latna maitam chi thei ahia (eiten pulpit neu ichi mai uhi). Biehinna a Bible simna, lasahna, thupuongna, Sawm-a-khat, silpieh leh adangdangte latnain a kinei hi Pulpit gei a koi ding ahi.

4. Pulpit Bible:

Pulpit Bible kichi khat koi zing ding ahi.

5. Tuohkhawm donna:

Tuohkhawm donna khu van koina ahisih leh Almirah sung a koi ding ahi

6. Sakrament vante:

Sakrament vante khu hattuum in kinei chiet ahoi a, tanghou leh Uain Hattuum mawpuohna ahisih ding a, Pastor in a mawpuoh ahi.

6.2. BIEHINN SUNG KIZAH DAN

(Biekhawmna ah mipite veilam ah Puitu tou van, Lai-aattu khu mipite zietlam ah touva, tualeh vaihawmna ah zong tambang ma hiva).

1.Puitu in: Puitu khu Pulpit mai laikimtah ah a tou ding a, amabou Hattuum vaiguon poimaw a um chieng in tuolsung Secretary ahisih leh Recording Secretary in a toupì ding hi. Puitu a din apatin mipiten laa a tel ding uh ahinawn sih a, Bible simin hunpan ding ahan mai ding hi. Amabou hunpantu ding aum sih leh midang septuomlouin aman hun patna thumna anei mai khu alemtang jaw hi. Ahitheitan in puitu in thunep noi leh gen leh sah ahaulou ding ahi. Laa atel ding leh jong tang khat agen ding a, Puitu in mipi dinsah leh tousah khu khutlam in a bawl ding hi.

2.Hattuum thupuonna: Lai-attu in hattuum toh kisai thute puong van, tualeh Department dangdang in amau sung a puon ding a um leh a kisaipi lai-aattu kung ah ang puon ding in ape ding uhi.

3.Silpieh lahkawmna leh latna: Tuohkhawm lahna ding hun ah phatna lakhat sah ding a puitu ahisih leh khuongpu ten atel uh sah ding ahi. Usherten tuohkhawm lahna ang nei jaw chieng un puitu in lat dingte apuong ding hi. Tuachin silpiehte lan ding in Pastor ahisih leh Upa guot a umpen in alan ding hi. Puitu in a dinsah ngal sih leh alantu in mipi vadinsah khelkhel angai sih ding hi. Tualeh tuohkhawm latna nei vai chi sese louin banoukhat dai dide in um van alan ngal ding hi.

4.Thugentu : Thugen diing guot a umten Pulpit luo paivan, thumapui saupipi leh guitam thu jong gen lou ding ahi. Tualeh Bible khu Thuhuntha leh Thuhunlui Bible tangte sim ding ahileh Thuhunlui apat Thuhuntha a pen khu sim nukhia ding ahoi hi. Pulpit ah tui dawnlou ham sawm ding ahi.

5.Khuongpu: Biehinn kaisung in khuongpu kitup tah aum ding a, Puitu ahisihleh thugentu in la tel ding a, a chiel ding kinepna toh kigingsa in a um ding a, mipite a ding ngaituo in laa pat dan a siem ding hi. (Khuongsat a mipi dinsah bawllou ding ahi).

6.Van koi dan: Pasian bie a hing kikhawmten amu thei diing ua van mawngmawng Biehinn sung a koilou ding ahi. Pulpit tunga dawn ding tui mipi mu a koilou ding ahi. Tualeh Pulpit nua lang a zong “puon sandup” chilou ngal bangma dang koilou/khailou hamham ding ahi. Synod kum puon ahisih leh hattumin kum puon anei leh tuomi khu tah ding ahi.

7. Biehinn kai hun (Timing): Nipi lai leh Phalbi hun sung a Biehinn kai hun ding anai bituh khat siem ding, tuakhu mipi Bieh khawmna akisuhna diing ahi. Tualeh anai dan zil a chowkider in dah khatna (First bell) leh dah nina (Second bell) asat jel ding ahi. Tamin Puitu leh Mipite a pui ding ahia, Biehinn sung a hun a kisuhthei pen leh atawmthei pen a jah ahoi ding hi.

6.3. KHRISTIAN NI POIMAWTE

<i>Kum</i>	<i>Good Friday</i>	<i>Easter Sunday</i>	<i>Penticost Day</i>
2017	April 14	April 16	June 4
2018	March 30	April 1	May 20
2019	April 19	April 21	June 9
2020	April 10	April 12	May 31
2021	April 2	April 4	May 23
2022	April 15	April 17	June 5
2023	April 7	April 9	May 28
2024	March 29	March 31	May 19
2025	April 18	April 20	June 8

6.4. Daah Sat Dan

(Hattuom toh kisai a daah satdaan tuomtuom umte)

1. Biehinn kikhop ngaina:

⊙,⊙,⊙,⊙, -----

2. School daah:

⊙⊙,⊙⊙,⊙⊙,-----.

3. Kimna/Patna (Second Bell):

⊙⊙ _ ⊙

4. Anneh dah:

⊙⊙⊙,⊙⊙⊙,⊙⊙⊙,-----.

5. Kitenna dah:

⊙⊙⊙ _ ⊙,⊙⊙⊙ _ ⊙,⊙⊙⊙ _ ⊙,-----

6. Lazil dah:

⊙⊙⊙⊙,⊙⊙⊙⊙,⊙⊙⊙⊙,-----

7. Zin dah:

⊙⊙⊙⊙ _ ⊙,⊙⊙⊙⊙ _ ⊙,⊙⊙⊙⊙ _ ⊙,-----

8. Mishi dah:

⊙-----⊙-----⊙-----⊙-----

9. Patau dah:

⊙⊙⊙⊙⊙⊙⊙⊙⊙⊙⊙⊙⊙⊙⊙, -----

.....

Khiiil – 7

7.1. BIBLE TANG POIMAW KHENKHAT LAHKHAWMTE

(Ahun bang zel a sim ding Bible tang poimaw khenkhat lahkhawmte)

1. Khawmpi Vaihawmna ah:

Rom. 12:16-17; Phil. 4:8; II Late 23:4; II Khang. 19:6-7; Zak. 7:9-10; Thup. 24:23-24.

2. Numei Khawmpi vaihawmna ah:

Thup. 31: 30-31; 12:4; Late 68: 10-11; I Tim.5:4; Late 113:9

3. Khristian Khanglai khawmpi ah:

Kih. 12:1; Job 34:2-4; Thup. 8:13; 1:4-7; Jer. 29:12-13; Thup. 24:21.

4. Naupang Khawmpi ah:

Eph. 6:1-8; Heb. 13:17; Thup. 23:22-23; 7:1-3; 6:1-2; Jer. 1:6-7

5. Zau a i um hun in:

Late 4:8,27; 34:4; 56:3,11; 118:10-14; Isa. 49:1-5; Matt.10:28; Jn. 14:1-4; 27; 17:20; Rom. 8:14-15, I Kor. 15:51-58; II Kor. 4:8-18; 5:1-8; 12:9; II Tim. 1:17; Heb.13:5,6

6. Lungkham hun in

Late 46; Matt. 6:25-34; Phil. 4:6; Heb. 13:5; I Pet.5:7; II Tim. 4:16-18; Late 37:1-11; Matt. 6:24-34; Heb.12:6-13.

7. Vangsietna in ang suhzau hun in:

Late. 20:6-9; 34; 91; 118:5-9; 121; Luk. 8:22-26;

8. Chimaw hun ituoh chieng:

Late 23; 37:1-17; 42:6-11; 55:22; 90:12-17; Matt.5:4,11,12; Jn. 14:1-4; II Kor. 4:8-18; Phil 4:4-7; Heb. 13:5,6; I Jn. 3:1-3.

9. Hun sie leh buoina i tuoh lai in:

Late 34; 37:23-40; 46; 118; 121; Matt. 6:25-34; II Tim 1:7; Heb. 4:16; 13:6.

10. Mang naseem ding a ikuon chieng:

Late 27, 121, 126:5,6; Matt. 10:16-20; 28:19,20; Luk.15:11-32; Jn. 14:1-4; Heb.11:8-16.

11. Pasion kepbitna ipoimaw hun in:

Late 27:1-6; 62; 84:11; 91; 139:1-12; Matt. 10:24-31; Rom.8:31-39; Phil 4:19

12. Lungsim hamuonna i poimaw hun in:

Late 1:1,2; 4:8;37; 4:8;4:11; 85:8; Luk. 10:38-42; Jn. 14:16; 20:22-24;33; Rom. 5:1-5; Phil. 4:6,7; Kol. 3:15; Isa. 40:1-11; 54:7-10; Jn. 10:1-8;14:15-27; I Kor. 1:3-7;4:16;5:1

13. Thumna i poimaw hun in:

Late 4; 6;20;25;42;51; Matt.6:5-15;18:1;20;Luk. 11:1-13;18:1-14;23:39-43; Johan 17; I Jn. 5:14,15; Late 30;34;86; 143, Matt. 7:7-11; Phil. 4:6,7; Jn. 17;Jak. 5:13-16.

14. Nuatol leh sol a i um hun in:

Late 6;5; 139; Matt. 26:33-35; 69; 75; Mak. 14:29-31;66;72; Jn. 21: 15-22; Rom 8:35-39; I Kor. 10:12-14; Kil. 2:3

15. Hutkhiehna i poimaw hun in:

Late 18:1-3; 34:7; 41:11; 46:1-3; 91

16. Damlouna le natna i tuoh lai in:

Late 32;38;41:2-4;91; Matt. 26:39; Rom 5:3-5; II Tim.2:3; Heb. 12:1-11; Jak. 5:11-15; I Pet. 4:12, 13, 19

17. Solna i tuoh hun in:

Late 1:73; 2:28; 119:9; 101; 110; 139; Matt. 6:24; 25:1-13; Mk. 9:42-50; 13:33-37; Luk. 21:33-36; Rom 13:14; I Kor. 10:13; Phil. 1:4-8; Jak. 1:12; II Pet. 2:9.

18. I kipah hun in:

Late 65; 84; 92; 95;100;103;116;136;147; I Tim. 5:18; Late 140; Late 23; Heb. 13:5,6

19. Buoina ituoh hun in:

Late 2;16;34; 37; 38; 40;51; 139; Matt. 11:28-30; Jn. 14:1-4; Heb. 7:25; II Pet. 2:9

20. I baa hun lai in:

Late 6;27;55;60;90; Matt. 11:28-30 Jn. 14:1-4; Rom 8:31-39; I Kor. 5:58; Gal. 6:9,10

21. Kumtawn a hin kinepna:

Late 16:5-11; Jn. 14:1-6; 27; 21:1-18; 19:39; II Kor. 5:1-9; I Jn. 2: 15-17; Kil. 7:9-17; 22:3-5.

22. Pasion mihepina:

Danp. 33: 27; Jn. 3:16, 17; Rom. 8:31-32; I Jn. 4:9-17; Kil. 1:5, 6.

23. Kisiana leh mani kipuonna:

Late 51; 130; Isa. 55:6-9; I Jn. 1:5-9.

24. Thumna ipoimaw hun in:

Late 30; 34;42;86; 143; Matt. 7:7-11; Phil 4:6,7; Jn. 17; Jak. 5:13-16; I Jn. 5:14, 15

25. Hatlouna pata hatna:

Isai 40:27-31; II Kor. 12: 7-10.

.....

LAI BU ETTE

1. Mizoram Presbyterian Kohhran, Pathian Biak Inkhawm Hruaina Bu, (Revised & Enlarged), Aizawl: Synod Literature & Publication Board, Reprint, 2010.
2. Mizoram Presbyterian Kohhran, The Presbyterian Hand Book, (Revised & Enlarged), Aizawl: Synod Literature & Publication Board, 1994.
3. Baptist Church of Mizoram, Kohhran Inkhawm Hruai Dan, Lunglei: 1999
4. Independent Church of India, Kohhran Inhruai Dan Bu, Churachandpur: 1996
5. Evangelical Free Church of India, Kohhran Inhuuai Dan leh Thuring Bulpui, Churachandpur: 1996
6. Evangelical Baptist Convention, Laibu Zat Tangjang, Khenpi I-IV, Churachandpur: 1996
7. Evangelical Baptist Convention, Kiphukhiakdan Puahphatna, Churachandpur: 2001.
8. Evangelical Churches Association, Pastor Khutchoibu, 2nd Edition, Churachandpur: 2015
9. Chin Baptist Association, Pawlpi Makai Khutzat Second Edition, Churachandpur: 2015
10. Lalpiangthara K, Sermon Tanpuitu, Chut thumna, Aizawl: 2015
11. Manipur Gam Presbytery, Hattuum Thununna, Churachandpur: 1999
12. Presbyterian Church of India, Daanbu, 1984
13. Manipur Gam Presbytery, Baptisma leh Mangpa Nitah Ann Bu, Churachandpur: 1984
14. Zomi Holy Bible (BSI), 1992

.....